

近代中國史料叢刊第二十九輯
沈雲龍主編

椒生隨筆

王之春著

文海出版社印行

光緒七年辛巳秋鐫

物生隨筆

上洋文藝齋新刊

w-196/10

語言富則文章雜議論遲則事實失往往沈雄博麗
光怪陸離而語涉新奇義鮮懲勸有識者弗尙也夫
鴻章鉅製自具體裁至於興到筆隨以誌心得偶有
觀記藉備遺忘如七襄機斑斕異色如記事珠璀璨
肴陳或諧或莊因小喻大豈盡矜心作意哉然胸中
有竹絃外餘音作者隨所至而形諸楮墨讀者隨所
解而觀其會通有未可以稗官野乘例視者清泉爵
棠子庶乎近之爵棠以不羈之才縱橫南北少事詩
書壯年獨留心經濟公卿間耳其名多心折焉故交

游最廣閱歷最深其所以自策勵復勤且敏以文人親武事筆墨不離左右凡入耳寓目可以資觀鑒者莫不手錄一通及彙輯成編固皆可傳而可誦蓋以見聞所周廣學識閑性情維世道人心於不徹噫其文顯其旨微已且吾竊見世之爲筆錄者矣書生好名動輒著作於時事則無關痛癢於古人則襲取皮毛辟如借山雞之羽舞鏡何堪斷孔雀之尾張屏不足卽有一二資採擇而支離渺茫令人讀不終篇殊無謂也椒生隨筆分八卷講學則具有淵源考典則

直探原本論詩則力宗風雅序事則務歸切近類皆
爽人心目耐人咀嚼雖不欲存其可得乎因書簡端
以質之閱者當不嗤余之阿好也

丁丑七月愚兄周壽昌序於都門小對竹軒


夫鼎鐘虞餼蠹也竹素常炳彪也詞章戒馳騁也踐履務閑馴也故太上三不朽殿以立言君子四未能準於顧行然而傳成劍俠類詳猿叟虬髯錄續稽神競說鼠人螳將義狃一偏語訾多妄可作噓譚之佐難爲覺世之資蒙竊惑焉尠所取也若乃見聞綦富折衷必黜媿嬰菟輯靡遺綜貫胥徵體用諧莊並列奇正相生金乍擲而地鳴壺欲投而天笑鍼砭愚賤鏤鑄神奸兼述作之才不嫌淺近備聖賢之旨罔苦艱深則 爵棠先生椒生隨筆一書得之先生烏巷

名宗鴻都夙慧清襟蘭郁綵管花生舊學衍船山一
脈黃書用纘箕裘新聞繙稗海千函綠字曾披籀篆
手如銀斷心淬金精織義組仁散珠橫錦雖數奇不
偶未登承平著作之廷而遇物能名久擅博雅淹通
之譽達者逆酋豕突狂寇猱與西北囂呶東南震擾
先生酬桑弧遠志自署戎馬書生託蓮幕棲身羣推
文鹿博士公卿迭薦牧伯交章符節頻司旌旄屢擁
壯幽燕之重鎮扼江海之要防踞嶼磯浮蝦島蛟龍
避舍豺虎潛蹤公望公才允副國士無雙之目獨來

獨往直到中華以外之天宜其懋建奇勳盡忘結習
豈將軍來天上方著翅欲飛復著述徧人間竟不脛
而走乎而乃倚鞍爲几磨盾作書飛耳審音平心察
物境無虛接戎樞默筦文樞事不空描戰壘偏張詞
壘總集生平所閱歷旁資僚友之流傳博采兼收羽
排鱗次法咫尺爛掌故於數千百年長歌短歌富
胸羅於二十八宿當夫聲停刁斗業理丹鉛刊僞正
訛芟煩就簡單詞隻字闡揚潛德幽光大義微言關
繫人心世道事憑珠記腋可裘成性情經濟文章範

圍不過嬉笑悲歌怒罵警悟俱深有時現宰官身爲
騷女癡兒說法有時受孔子戒使豎儒曲士斂容綺
麗閒登創懲隱寓幾經意匠用付手民猶復馳翰求
音傾衿下士高張鐵網窮搜大海遺珠廣啟藥籠欲
貯空山小草子建命仲卿作序貴賤忘形延之喜明
遠定評謙沖在抱芻蕘荷采匏瓦思鳴承寵命之時
頒慮堅辭之轉妄恭聆緒論知祕書本自虞初謹製
弁言疏短引竊居盧後非鳳凰飢之空歎難容杜甫
於軍中以牛馬走爲前驅願廁鄒枚於席上

辛巳正月祝松雲序於衡郡石鼓講舍之留待軒



家世本青箱蔚然經籍光見聞新耳目遊戲亦文章
記事憑傳述書紳等不忘網羅多掌故隨意付奚囊
碌碌嗤公等因人少重輕君才自名世本色尙書生
著作餘文興謳吟遣宦情匡時多事業行見佐承平

序初譚鈞培拜稿

邇來文士喜荒唐說鬼譚天事渺茫拈出生花一枝
筆性情經濟大文章

湖湘著述重船山祖武箕裘輝映間俟解黃書留墜
緒一齊補綴醒癡頑

據事直陳衮鉞參箇中書味自醇醇偶然涉筆略成
趣藥石鍼砭異腐談

綺語偏饒絕妙辭零縑斷楮拾無遺英雄自是多情
種風月鶯花仗主持

所見異詞聞異詞疑疑信信費詳推拏舟稗海獲津
逮太史輶軒藉取資


消夏無因破睡魔瑯環雜誦耐摩挲列莊妙諦中庸
旨險語何須說老坡

檀浦梁肇煌頓首未定稟

天下形形色色見見聞聞莫不有以開發人之心思
警動人之耳目無心置之斯過而不留耳余性魯苦
無記誦之學事無大小有可資觀覽助談柄者暇輒
筆於書隨得隨記久而哀然成集積以歲月窮控古
今然後知後海先河爲山覆簣而於聖賢六經之奧
國家治忽之原民生根本之計漸有所窺始悔向日
學之不博見之不卓方擬舉付一炬以免敝帚千金
之誚而友人謬許爲可存愆愆付梓夫天下之理無
窮而君子之志於道也不成章不達故昔日之得不

足以自矜後日之成不容以自限假我數年將擇焉而精語焉而詳所以明學術正人心厚風俗以興平治之事者則有志未逮姑先以此本質之同志名曰隨筆山中白雲祇自怡悅不堪持贈覆瓿燒薪將一任諸覽者

光緒三年丁丑九月爵棠王之春自識於京口軍次



椒生隨筆目錄

卷一

戒子孫

周文忠逸事

字經百鍊

戚少保遠鑒

惆悵詞

蒙求釋註

月當頭

任邱題壁

嘲潘

詩有來歷

輓塔忠武聯

哀輓運典

咏曹操

秦檜王氏對語

陳忠愍祠堂聯

陳慶雲

家夢樓先生詩冊

詩意含蓄

金陵士人

宣化風俗

咏村學詩

名言不必出自賢哲

御輓林文忠聯

潘文恭公

咏譙周

周太守

兒時詩

胡文忠公

盜鼠兵貓

專責集事

貧士增減

卷二

惜字

論加廣學額

正定府十四屬對句

精忠廟聯

回文集

張文毅撰聯

板橋詞句悖律

陳畊雲詩

黃雲孫先生詩詞

墨劫

八字官人

二賢祠

破句別字對語

嘲鹽城令聯

咏楚霸王

論聊齋志異

謝給諫疏語

古人抄襲

論三焦

別號

大銜借補小缺

折福

論軍需報銷

有文在手

劉霞仙中丞自陳語

昭雪故相

淮海秋笳集

李韋二逆禍本

養氣

椒生隨筆卷一

清泉王之春譔

戒子孫

予七世祖 船山公諱夫之戒子孫云勿作贅婿勿

以子女出繼異姓及爲僧道勿嫁女受財或喪子嫁
婦尤不可受一絲勿聽鬻術人改葬勿爲訟者証佐
勿爲人作呈訴及作馱保勿爲鄉團之魁勿作屠人
廚人及鬻酒食勿挾火鎗弓弩網獵禽獸勿習拳勇
咒術勿作師巫及鼓吹人勿立壇祀山操跳神能士

者士其次醫次則農工商賈各惟其力與其時吾不敢望古人之風規但得似啟禎間稍有恥者足矣凡此所戒皆船山公所深鄙者若飲博狂蕩自是不幸而生此敗類無如之何然其繇來皆自不守此戒喪其惻隱羞惡之心耳

周文忠逸事

周文忠

天爵

有勇力居恆舞大刀自樂性卞急而至孝每坐堂皇怒而刑人聞太夫人召卽止而退太夫人怒則跪而請罪色愉如也或言公一逸事云公任

漕督時以太夫人久旋里遣幹弁賚金爲母壽囑言
是積俸之貲懼太夫人不納也僕至里第見太夫人
果詢以金所自來僕具以對太夫人曰得由積俸吾
姑受之爾歸語主人好自作官報 國然須變情
性爲寬和庶幾留一頭顱爲將來見我地步僕唯唯
迨歸見文忠詭言太夫人甚喜且僞作安慰語文忠
俟其言畢遽令縛而鞭之僕不得已以實告文忠乃
喜釋其縛曰太夫人訓我素嚴豈肯作好言語汝後
述者乃真我母語也我聞之如見母矣遂賚僕而忻

悅者累日公之純孝如此

字經百鍊

予題羨園詩有秋因諱老施顏色之句友人亟賞之
謂諱字經百鍊而出近讀畊樓句云天地矜秋色意
與予合而矜字亦百鍊得之者

戚少保遠鑒

汴城書生言曰未有權臣在朝而大將能立功於外
者戚少保紀效新書有或問一篇蓋明人積習惟便
私圖而不問國事已在事中則攘功避過以身之利

害爲可否以心之愛憎爲是非已在事外則嫉忌成
功惡人勝已吠聲結黨倡浮議以掣其肘戚公深鑒
於此故反覆論辨之蓋爲當時文臣發也節四庫全
書提要
卒以張江陵沒半載讒構紛沓竟罷歸悒悒以終信
乎江陵之非權臣使分宜復起恐戚少保亦岳少保
之後車也

惆悵詞

毘陵名士陸秋岩

崇蘭

懷才不遇賚志以歿詩筆清

麗萃縣存稿甚富予見其所作惆悵詞四首錄其三

云娥娥紅粉盡盤鴉亭短亭長記那家紅豆譌殘金
縷曲綠蕪影冷玉鈎斜海能填恨思啣石月解銷魂
爲葬花一別匆匆如夢裏由來門外卽天涯白石青
松證舊盟江天何異隔層城海棠只爲愁紅死胡蝶
偏教傅粉生已過光陰殊造次未圓心事怕分明人
間絕少埋憂地便擬驂鸞上玉京晶簾十丈引遊絲
瘦骨青衫嬰母知醉後却嫌天地窄春來便覺性情
癡綠波南浦愁江草細雨荒墳唱鮑詩記得小紅猶
未嫁合歡不贈贈將離又一聯云蕉葉裁成描蛺蝶

菱花留得嫁鴛鴦句亦新雋

蒙求釋註

唐李瀚蒙求一書以四言韻語類列古人而各繫以事後仿其體而爲之者若王令方逢辰陳櫟凡數家近日通行之龍文鞭影較此詳備而不及其古簡貴陽蔣允之太守爲之釋註所謂日記一事久自貫穿益初學之見聞不是過也

月當頭

萬事不如杯在手一生幾見月當頭前人句也每歲

以十一月望日爲月當頭是日子刻立竿無影他月
不然否則常有團圓何必云一生幾見耶憶吳竹橋
太史咏月當頭喝火令詞句云笑說今宵明月十分
圓笑說今年明月還有一回圓意特新倩

任邱題壁

有人題詩四首於任邱壁上僅記其三聯云花開三
蒂從來少梅爲分嘗分外酸願從世界栽紅豆敢向
天涯錄小名一枕夢回雙蛺蝶百年人得幾團圓下
署蠡莊二字蓋深於情者

嘲潘

崇川潘公子幼隨父宦京師弱冠成翰林意得甚旋里集諸少年爲徵逐游甚至登場演劇有人嘲以偶語云京調唱崑腔這翰林另有班子斯文更曲譜那秀才好箇優生斯可謂善謔矣

詩有來歷

鄭板橋詩鈔中有句云貪看斜陽婢倚樓人謂焉有如此雅婢予笑曰胡爲乎泥中此誰氏婢也豈如小家之豢於廚下而蓬頭赤腳者哉板橋詩固自有來

歷

輓塔忠武聯

曾侯相輓塔軍門 齊布 云大勇却慈祥論古略同曹

武惠至誠相煦嫗有章曾薦郭汾陽彭雪琴宮保亦

有輓聯云諡并武鄉侯湘鄂戰功青史在壽同岳少

保 忠武以積勞嘔血薨於九江年三十有九 古今名將白頭稀相國與忠

武同患難而彭公則稍間矣情誼有別辭氣不同而

確切莫移則一也

哀輓運典

哀輓以抒真性自應白描爲妙而運典真切者如余
上歲輓妹一聯撰句云汝性最聰明曾伴阿兄吟柳
絮甥濟均穉弱忍看若輩著蘆花

咏曹操

漢陽戴景舉

喻讓

咏曹操云賣履分香兒女情讀書

射獵英雄氣如何橫槊對東風老年想作喬家婿予
亦有咏曹操云文章功業兩稱奇歷代奸雄奉作師
九錫自加尊武帝千金尙肯贖文姬老而不死真謂
賊謁者之監尙有兒聞說當年能治許阿瞞可惜出

非時末二句令阿瞞見之當又大笑

秦檜王氏對語

湯陰武穆公廟前有秦檜王氏万俟卨高張俊四鐵像
列跪其下反縛如就刑狀有人製一對語其粘於秦
檜者云咳我縱喪心有賢妻必不若此其粘於王氏
者云啐妾雖長舌無鄙夫何至于斯作互相怨懟口
角是亦妙謔矣哉

陳忠愍祠堂聯

陳忠愍化成以江南提戎督軍禦外夷於吳淞中礮

陣亡勅建專祠熊觀察一本題聯云昔時未讀五車書雅量清心温如玉冷如冰是大將實是大儒使天下講道論文人愧死此日竟成千載業忠肝義膽重於山堅於石忘吾身不忘吾主任世間寡廉鮮恥輩偷生借題發揮大力包舉直是下語如鑄

陳慶雲

陳慶雲軍門

國瑞

湖北麻城人初爲黃殿臣

開榜

養

子後復本姓驍勇善戰性嗜殺斬庖丁不勝計執刀匕者恆惴惴也歷戰克捷功頗偉嘗語人曰戰要戰

得穩追要追得狠退要退得緊予謂此乃名將語又
助修黃鶴樓擬聯云黃鶴飛來復飛去白雲可殺不
可留人怪其下句之奇慶雲笑曰君未讀唐詩乎總
爲浮雲能蔽日長安不見使人愁浮雲比安祿山非
其可殺者乎雖自作聰明尙有可採

家夢樓先生詩冊

予曾於友人處見夢樓先生文治手錄近作一冊書

法秀勁詩調鏗鏘令人把玩不釋其實獲我心者如
破風萬里餘豪氣策蹇三年有淚痕實媿頭銜稱著

作徒教僮僕費饗飧芳草心情淹妓館梅花時節上
僧樓英雄溫飽有髀肉文士依羈無遠謀真不啻爲
浪跡半生者寫照也

詩意含蓄

友人潘慎初粵西孝廉積功至觀察有榕陰草堂詩
集金陵襍感七律二章詩境閒遠備極含蓄不受前
人束縛首云山形平遠水滌洞地到江南氣象閒讀
史不無興廢感濟時空論古今才眼前勝景非金粉
劫後餘灰付草萊尙有近年征戰迹等閒步上雨花

臺次云恣遊東北遍西南世味親嘗苦與甘名士過
江多習氣丈夫投筆總空談清涼近挹青山色妙相
間尋古佛龕我本書生慣戎馬頻年僑寓又何堪他
如名利兩途羞畫虎詩文一道付雕蟲詩情敢謂江
山助豪氣難將湖海除春風原野縈荆棘落日林邱
灌菜蔬花前得句詩情遠亂後談兵膽氣豪飽嘗世
味休吞棗駟逐名場類嗜癩等句皆可誦

金陵士人

賊陷金陵後聞一士人夙有文名令作僞王府堂聯

士人援筆立就云一統山河七十二里半

金陵週外城計七十

二里半也

滿朝文武三百六行全某賊怒殺之嗣以一論

一詩開科取士詩題爲四海之內一東王一士人極力作頌揚語僞東王楊秀清大悅賜狀元及第秩同統制遊街之次日卽逸出二士或激烈或明哲均合乎道也

宣化風俗

宣化以每歲季春出郭外萬柳踏青男女襍坐席地飲酒墮珥遺簪日昃不禁解裙挂於樹杪日挂紅遙

望之紅綠飛揚殊有可觀又於五月十四至十六日
原爲總戎晾甲之期土人訛爲晾腳會故於此三日
無論貧富婦女羣坐於大門以外日必易著新鞵其
富厚者日凡四五易遊人指視贊其纖小則以爲榮
此俗尤陋

咏村學詩

隨園詩話載有牧童七八縱橫坐天地元黃喊一年
之句已形容盡致矣趙雲松先生句云惟有村童讀
書聲都都乎文喧不已謂錯讀郁郁乎二字也許文

恪公乃普句云杖藜扶出村夫子多少兒童散似鴉
均是咏村學詩亦足稱傳神之筆

名言不必出自賢哲

今州縣大堂戒石箴曰爾俸爾祿民膏民脂下民易
虐上天難欺按張瑞義貫耳集本二十四句爲蜀王
孟昶語宋高宗摘取之又清慎勤三字爲司馬昭訓
長史之言見三國志可見至理名言不必盡出自賢
哲

御輓林文忠聯

林文忠一代偉人近罕倫比強疾視師中途星隕天
下惜之相傳有御輓一聯云答君恩忠慎清勤
四十年盡瘁披誠解組歸來猶是心存軍國迪朕德
馳驅險阻六千里出師未及騎箕竟去空教淚灑英
雄見者莫不流涕

潘文恭公

潘文恭公富貴壽考亦近時之有一無兩者也公成
童時應蘇郡試太守李公器之出句命對云范文公
天下爲任公應聲曰韓昌黎百世之師李公擊節拔

冠一軍書其卷尾云此子早安排作狀元宰相矣人服李公之先識文恭自輓聯云鄉夢久無憑那有閒情問松菊 主恩慚未報好留餘悃付兒孫時金陵已遭淪陷公雖予告而歸其忠 君愛國之思溢於言表

咏譙周

予有咏譙周詩怒罵痛快錄其三首之一云諸葛年才五十四遐齡高壽乃譙周老而不死眞爲賊降表煩伊兩次修

周太守

周太守 沐潤

寄籍汴城以庶吉士散館出宰江南歷

任繁劇所至有聲然素負不羈之才未免忽於細行
有富金者吳門名妓也嘗贈以聯云我富文章卿富
豔兼金聲價斷金交遂爲台諫官糾參迫有事復官
宰常熟題堂聯云十日雨五日風歲乃常熟九年耕
三年蓄民其姑蘇二聯均膾炙人口後擢守常郡

兒時詩

予九歲初學詩一日遊郡北育嬰堂樓上祀武穆王

神像下跪秦檜等口占一絕云育嬰樓接岳王祠日
冷風寒積樹枝扇擊佞臣揮涕罵有人匿笑道予癡
塾師見之謂此子後必工吟及今思之真不脫小兒
氣

胡文忠公

益陽胡文忠父諱達源官至少詹事母湯太夫人娠
公時夢五色鳥飛集屋後叢張兩翼翔鳴羣鳥從飛
啄林中芝草因名林翼字詠芝年八歲陶文毅澍見
而驚爲偉器遂以女字之公後以翰林典試江南緣

案註誤家居養晦題齋居聯池圃足高臥圖書供古
歡尋以林文忠敦勸出山乃以知府分發貴州洊擢
至湖北巡撫咸豐十一年七月 顯皇帝龍馭上
賓八月公以勞瘁薨於位曾侯相請以功績宣付史
館疏略云六年十一月攻克武漢以次恢復黃州等
郡縣悉師越境圍攻九江又分兵先救瑞州督撫之
以全力援勦鄰省自湖北始也後功甫歲復奏明以
全鄂之力辦皖北之賊越二千里援解湖南寶慶之
圍援湖之師未返又議大舉圖皖先滅髮匪保三吳

之財賦雪敷天之公憤繪圖數十張分致與官文暨
諸路將帥晝夜諮謀又云每遇捷報之摺皆不專奏
恆推臣處主稿偶一出奏則盛稱諸將之功而已不
與焉其心兢兢以推讓僚友扶持善類爲務又云臣
與該故撫共事日久相知最深曾奏稱胡林翼之才
勝臣十倍近則遇事諮詢尤服其進德之猛不敢阿
好溢美亦不敢歿其忠勳等語又輓聯云逋寇在吳
中爲 先帝與蓋臣臨終憾事薦賢滿天下願後
人補我公未了勛名紀實之言誠非溢美侯相眞公

之知已哉

盜鼠兵貓

嘉慶戊寅閩有海濱小盜船竊發兵船大而不能徧
搜阮文達撫閩謂此等如蝗有蝻尤宜撲滅遂雇民
船配弁兵扮作客商專走淺河小港誘緝小匪從此
盜絕有因無盜而議撤者公曰養貓所以捕鼠若無
鼠而不養則鼠又出矣比喻最確

專責集事

嘉慶甲戌歲楊忠武入京

陞見

上問從前

三省軍務

湖北陝西四川

何以延至十數年之久現在兩次

軍務

河南教匪陝南饑民之亂

何以蕝事之速公對以有專責則

事易集

上首肯者再公武人也而一言能發修

齊治平之蘊

貧士增減

貧士增減數則可供一噓其語云愁日增意氣日減
藥方日增酒量日減奔走日增交遊日減子女日增
婢僕日減索債人日增借債人日減典票日增質物
日減妻孥怨恨日增帷榻柔情日減市兒牙儈之穢

語日增登臨賞玩之清緣日減厭態日增佳趣日減
慈悲心日增計較心日減予又加四則云詩日增睡
日減案牘日增酒量日減親友獎譽日增田間樂事
日減零碎書畫日增完善玩器日減

椒生隨筆卷一終

椒生隨筆卷二

清泉王之春讓

惜字

外舅蕭公

繼昌

佐賀耦耕先生

長齡

於蘇藩任時辦

海運先生勤于政除夕觴幕中客執盃問曰有遺事否蕭曰惟一小事尚宜辦之賀蕭然曰願聞蕭曰署中字紙灰向不准收飛積厠穢何如以大竹篋盛之發交糧艘帶至津門再擲諸海旣鎮風波又爲惜字之一道推之各州縣亦應遵辦賀爲首肯立即通飭

照行嗣據州縣呈報合本署所收者共三千四百餘
篋先大夫聞知作書有云一言之福公之後其無慮
無讀書識字者乎

論加廣學額

戊辰之秋湖北學政張湘濤太史之洞以團練捐輸
加廣學額太濫請飭疆臣切實核減部臣變通定章
一疏有云初學者略識之無便懷徼倖之想幸中者
未嘗學問更無求進之心將向來文物薈萃之區寢
變爲荒蕪譟陋之習不學者以爲得計老成者深有

隱憂況人數過眾則官師之約束難取類過寬則士林之流品雜其於士習文風殊有關繫云云夫進取難則真才出而國強進取易則僞士多而國弱太史之論合乎正本清源之道矣

正定府十四屬對句

直隸正定府屬十四州縣好事者各綴二字曰正定將軍行唐使者元氏夫人阜平老人晉州客人獲鹿道人井陘童子靈壽仙官贊皇丞相無極大帝平山大王欒城公子新樂公主藁城草寇如小說中之稱

謂然頗覺連貫誠匪夷所思也山左戴紫垣集成對
句更見巧思其句云公子何翩翩也喜仙官暗繫赤
繩於是夫人議婚老人主盟彼童子無知但憑使者
行媒聘定藏嬌公主大帝其巍巍乎賴丞相借籌玉
箸因而客人享利道人服教雖草寇竊發可卜將軍
報捷削平恃險大王

精忠廟聯

武昌精忠廟祀岳王實勘於此康書臣大令撰聯云
人其國不非大夫若宋高宗且不論古之人責備賢

者於張魏公又何誅運以史筆下語如鑄

回文集

朱文公劉靜修文集俱有菩薩蠻回文詞隨句倒讀
不免意複總不如自尾讀回爲妙邱瓊山濬有秋思

回文菩薩蠻詞云紗窗碧透橫斜影月光寒處空幃
冷香炷細燒檀沈沈正夜闌更深方困睡倦極生愁
思含情感寂寥何處別魂銷謝默卿司馬依調詠春
閨云飛花落盡春歸早客遊遨處青青草芳樹曉啼
鶯愁勞夢又驚魂銷香惹袖翠積眉山皺微顰小立

時多愛意遲遲又張紫繫寄懷素蘭六妹回文虞美人云明窗半掩一庭幽夜靜燈殘不得留風冷結陰寒落葉別離長坐倚高樓遲遲月影移斜竹疊疊詩餘賦旅愁將欲斷腸隨斷夢雁飛連陣幾聲秋女士名芬一字月樓

張文毅撰聯

鄂撫青墨卿中丞磨待士卒有恩眾樂爲用徇一總兵請移兵就餽入湖南境天子震怒正法荊州死之日三軍皆哭張文毅帶挽以聯云雷霆雨露總

楚北陳畊雲送唐太守子方之任鞏昌有句云二千石正爲良佐一萬里原是壯遊楊柳歌殘辭鄂渚葡萄酒熟趁涼州工緻極矣楊柳句用韋皋從武昌移蜀事唐亦從武昌赴隴用典雅切

黃雲孫先生詩詞

丁卯夏於都門購得武進黃雲孫先生永詩詞詩名秣陵刪僅百十餘首詞名公車詞僅七十餘首春讀而考証之蓋國初人物也其詩則筆力清遒不同凡響其詞則意旨雄邁亦脫恆蹊頗於朱王各大

家獨標一幟特錄其聽蛙句云多言勿乃躁羣聚近
於爭邗莊句云空庭花習靜深院鳥長飢過有秋堂
小飲句云年來貧病無休日說到文章有戒容小樓
曉起句云雄心過去翻成俗好夢圓時每自危又花
月有情成痼疾山川無恙作深交又一二酒徒盟鐵
券尋常花徑歎銅駝虞美人二闋咏虞姬墓云馬嵬
坡下昭君塞幾件傷心外虞姬墓上不須悲猶與項
王白首兩同歸垓心一劍香魂渺變作風前草我今
折得草歸來欲與斷腸秋色一齊栽英雄自古推劉

季差有人強意一意辟易呂家狐願與食其審老大
家夫一姬死後難相顧枉自謫聲楚項王聞此目矜
猶應與虞姬長笑幾千聲

墨劫

常山王灼齋昶太僕富而有墨癖所藏自唐代迄
本朝名煤不下數百種殊珍異之弗輕示人戊午春
髮逆突擾倉卒奔避未及攜以俱行寇退亟歸則各
墨融煮兩鍋以刷印偽示而用其半翁爲痛哭

八字官人

相傳 高廟精於月旦嘗以同田貫日氣甲由申
八字評定人才以決用舍中如貫字氣字爲最得形
容之妙能知人者能官人大知固不獨虞舜也

二賢祠

開州長垣之交有閔子騫公西華墓隆阜相望祠祀
二賢地藉以名黃河繞流從未沖沒難黎均結茅其
上以避水災祠聯云父母昆弟人不間其言宗廟會
同孰能爲之大本地風光不煩雕琢

破句別字對語

相傳一納貲爲宰官者遇童試出對云父母干戈干
朕琴朕弼朕二嫂一童對云達尊三爵一齒一德一
朝廷破句別字竟成絕妙對偶

嘲鹽城令聯

某明府宰鹽城不甚愜民意有人大書聯語粘於照
牆云當時只說此之謂今日方知惡在其可爲一笑

咏楚霸王

鄭板橋先生咏鉅鹿之戰有云項王何必爲天子只
此快戰千古矣後讀康書臣止馬河一詩亦不蹈人

云亦云之習均可爲項王吐氣也其詩云楚人此止馬漢人此得鹿得鹿不必歡止馬不必哭太尉不安劉幾乎易產祿重瞳雖敗亡令人舌難縮楚王不用賢亞父保骸骨漢王能用賢淮陰滅三族楚王有烈如漢王無賢后貞淫判兩途青史分芳臭鴻門遇高祖不失其爲厚取敗在欺敵故爾功不就後世多滄桑李趙慌忙走作詩慰重瞳江山非漢有

論聊齋志異

衡陽曾畊樓曰聊齋一書效左氏則左氏效檀弓則

檀弓效史漢則史漢出語必古命字必新葉生一則
中有尺牘云僕東歸有日所以遲遲者待足下耳足
下朝至則僕夕發矣語簡意明效魏晉亦似魏晉也
又云聊齋論斷卽後漢論斷楊忠愍一則論云先生
生爲河岳死爲日星世多以遇仙爲先生惜然鄙意
謂天上多一神仙不若世上多一聖賢此等議論前
人未道有功於儒不小又云聊齋善於用典真如鹽
着水中也讀其四六可以見其無一字無來歷又云
人知之喪汝德人不知亦促汝壽是絕好語愚謂德

字不如名字又云輕薄之態施之君子則喪德施之
小人則招禍此言可以爲佩

謝給諫疏語

儀徵謝夢漁給諫

增

請誅已革兩江總督何桂清一

疏有云何桂清蒞任以後惟以張宴演劇爲事常州
知府平翰等競進玩戲男謔女舞日集於庭遂置軍
事於不問及和春丹陽敗衄退往常州何桂清卽俶
裝思遁紳民聞信遮道攀留願效死守何竟令親兵
開放鎗礮傷死士民吳九喜等二十餘人突門而出

逃至常熟之十里亭縱令兵丁放火劫掠居民鋪戶
實受其害迨經奉 旨逮問兩年之久屢奉嚴催

始行到部又云迹其所爲旣屬形同寇盜延不就逮

尤爲藐視王章

云

云聞和春軍潰時有營員奔告之

何何適舉茶欲飲杯落於地神色無措夫無膽識者
必無志節詎解泰山鴻毛之義哉

古人抄襲

秦少游臨江仙詞直抄錢起詩曲終人不見江上數
峯青二句宋子京詞問牧童遙指孤村道杏花深處

那裏人家有全取小杜詩借問酒家何處有牧童遙
指杏花村句意沈石田啓南老景詩有云今日殘花
昨日開此七字與唐崔惠和句一字不易可見古人
亦不免抄襲也

論三焦

蓉塘詩話云蘇黃門龍川志云彭山有隱者通古醫
術與世諸醫所用法不同人莫知之單驥從之學盡
得其術遂以醫名於世驥曰古說左腎其府膀胱右
腎命門其府三焦男子以藏精女子以繫包以理主

之三焦當如膀胱有形質可見而王叔和言三焦有
臟無形不亦大謬乎蓋三焦有形如膀胱故可以藏
有所繫若其無形尙可以藏繫哉且其所以謂之三
焦者何也三焦分布人體中有上中下之異方人心
湛寂慾念不起心火熾然翕攝三焦精氣入命門之
府輸瀉而去故號此府爲三焦耳予後爲齊州從事
有一舉子徐遁者石守道之壻也少嘗學醫於衛州
聞高敏之遺說療病有精思予爲道驤之言遁喜曰
齊嘗大饑郡郭相鬻割而食有一人皮肉盡而骨脈

全者遁以學醫故往觀其五臟見右腎下有脂膜如
手大者正與膀胱相對有二白脈自其中出來脊而
上貫腦意此卽道家所謂夾脊雙關者而不悟脂膜
如手大者之爲三焦也單君之言與所見悉合可以
正古人之謬矣今醫家者流皆執叔和三焦無狀空
有名以自信不聞有此說故錄之予謂此論可補諸

醫書之闕

別號

古人有字無號別號不知始自何人然別號太多者

幸而名傳後人將不知誰何矣鄭板橋先生云八大
名滿天下石濤名不出吾揚州何哉八大純用減筆
石濤微茸耳且八大無二名人易記識石濤曰宏濟
又曰清湘道人又曰苦水和尙又曰大滌子又曰瞎
尊者別號太多翻成攪亂八大只是八大板橋亦只
是板橋吾不能從石公矣此論極當

大銜借補小缺

江督曾公

國藩

奏武職各員大銜借補小缺前經奏

准嗣經部駁此次奏補長江水師各缺甚至以提鎮

之銜而借補千把之缺以入營之資格極久列保之
次數較多而家中貧寒如故情願一小缺爲終身衣
食之資統計各省軍營保至武職三品以上者不下
數萬人將來軍事大定各路撤兵此項有階無缺之
員難保不滋生事端同治三年沈葆楨請安置此項
人員自提鎮至都守照實缺例給予俸銀米石

飭下臣議臣以糜費太鉅未經議准或每年將借補
者酌補六七成序補者酌補三四成截至同治二十
七年止此後仍按班序補請
旨將綠營將備借

補小缺一案一併

飭部核議見同治七年三月

京抄

折福

程拳石先生謂終日無事寫字讀書亦爲折福予生平最好此二事忙裏偷閒非握一管卽把一卷然則予之福折多矣

論軍需報銷

倭相國仁等請以同治三年六月前各處軍需概免冊報自七月初一日起事竣後一體請銷疏略有云

其造冊按例定之數不溢一絲而陰將款目浮開鉅萬者與例既符卽在准銷之列其以實用之數登之銷冊而并無絲毫浮冒者例稍未符卽難核准然則報銷一事卽能弊絕風清而實數不准銷准銷非實數虛文相襲甚無謂也云云實數不准銷二語確切時下虛文之病片言足抵千百

有文在手

益陽胡宮保有文在手如田字劉省三爵帥兩手如指斗文予有文在兩手如井字考唐叔有文在手曰

友曰虞

古文作

劉淵有文在手曰淵彭神符有文在手

曰神符張文潛有文在手曰耒故以為名

劉霞仙中丞自陳語

湘中劉霞仙中丞

蓉

初以胡文忠密薦嗣在駱文忠

幕府又叨薦剡特

簡川藩蔣京卿

琦齡

有慎名

器之奏論列及之方伯自陳乞退中數語云民力既盡尚為竭澤之漁苛政未除更獎催科之績事非出於不得已情實迫以難堪確切沈痛是謂不忍人之言

昭雪故相

柏靜濤相國後清廉端正不阿肅順肅頗銜之咸豐

戊午典京兆試以失察家丁斬祥舞槃肅順竭力搆

陷己未二月十三日特宣情有可原法難寬宥

言念及此不禁垂淚之諭遂與羅鴻繹等同棄市觀

者流涕監刑者肅順暨趙公光也趙則悲泣不勝肅

則揚揚得意都人痛恨肅順始此今上御極肅

順等伏法任侍御兆堅以栢公情罪未明奏請昭雪

有云永建嗣統先明楊震之忠隆慶改元卽贈夏言

之諡又云爾時承審之載垣等意在攬權多方羅織

靳祥之口供未吐交關之實跡毫無附會科場妄議

定案

云

云

諭旨通行中外欽悅

淮海秋筮集

淮海秋筮集詞爲甘泉李永署所輯共十二家都爲
哀怨之音蓋因兵燹化離有感而作也永署自序有
云雍門之操非媚賞於聾俗車子之奏期躡佞於溫
胡苦調文心是所望於觚俞之聽也 云 我也目斷
湖山魂驚擊鼓偶披此卷輒愴予懷以名作如林分
選誌賞蓋掬新亭之淚步石帚之塵不僅以撓酥摘

粉爲工也

李韋二逆禍本

道光戊申吾湘新甯令李博平糶勒價二千文一石
次年差役訛詐雷再浩之妻黨以致李沅法乘時倡
亂廣西桂平韋正因謬懸登仕郎匾額疊次訛詐因
倡亂後稱北王官吏詐贓實爲禍本嗟乎地方不安
由官邪也犯上作亂是誰階之厲乎

養氣

聖賢工夫以知言養氣爲主而氣之難養總由七情

六欲不能制耳何也怒則氣上喜則氣緩悲則氣消
恐則氣下寒則氣收炁則氣泄驚則氣亂勞則氣耗
思則氣結善養則無是矣

椒生隨筆卷二

椒生隨筆目錄

卷三

日記

論將

金牌鋪題壁詩

壽陶宮保

黃仲則詞

泰謙

鍾學士疏語

論拾

挽陳二山聯

咏錢串子

求官詩

女戎

而字

張文端楹聯

戒洋烟詩

李密不矜名節

論士大夫

眞總督

禪機聯

年大將軍詩

胡文忠撰聯

徐樹人中丞

論流寇

茶亭飯肆聯語

聖祖賜聯

北音無入聲

駱顛門制軍

剔牙籤

黑相公

野戰

湖口昭忠祠

李次青方伯四六

楊忠武公

童夫人

陶詩

四嬋娟

卷四

自警箴

十分本事

勝克齋宮保

香奩雜咏

治回良策

湯海秋銓部

林文忠語

閑談可作楹聯

觀書穎悟

趙部郎

黃公疏語

得人

水龍

張江陵

老頭兒

鏡花緣

甘肅需次咏

勝敗

秦檜無後

軍營積習

忍

廬州人物

咏太宗

傲骨

獨睡丸

慈訓

邢方伯

嚴西園語

臺諫取貌

無雙譜補

楚北無雙譜

三二陸三王裏

黎中丞聯

衢州聖裔

欽定四庫全書

楊仁一院會

目録

三

椒生隨筆卷三

清泉王之春譔

日記

予日記晴雨及瑣事人都笑之嘗觀國初周文襄公刊有日記十數卷敘事略備後曾文正公亦手書日記蓋公才識固優於人其勤慎專心於公事蚤起晚眠皆有恆心實非人所能及者見公在任時月置一簿自書日行纖悉不遺每日陰晴風雨亦必詳記人初不知其故一日臬司詳稱某縣民告糧船江行失

風京控一案公察其失船爲某日午前午後東風西風詞情兩歧公一批駁其日時風候讞官驚服從新翻訊詐遂不得逞觀此則古人亦嘗爲之惟予不能如文正公之有作用耳

論將

太公曰存亡之道命在於將後世多委之功勳之胄而廉能勇略者不與焉此輩習統袴而厭膏粱詢以韜鈴不知何物目未辨旌旗之色耳未聞金鼓之音身未經鋒鏑之交足未履沙場之地易曰師貞丈人

吉而以弟子主之能勿取輿尸之凶乎太公爲逆料
語而真切如此恐太公前已有此一流人物

金牌鋪題壁詩

金牌鋪距趙州八里無名氏題壁云十二金牌驀地
來將軍奉詔不疑猜金人狡獪原無比天子昏庸實
可哀和虜議非今日定殺公端不此時開迴思密語
終宵候已見官家忌將才論古有識詩亦侷儻

壽陶宮保

陶雲汀澍宮保以十月生六旬壽時已督兩江某觀

察一聯大爲宮保所賞懸之首座其句云八州都督
五柳先生經濟文章歷代心傳家學遠六秩初周一
陽來復富貴壽考百年身受 國恩長

黃仲則詞

黃仲則詞近髯蘇頗有鐵板銅琶唱大江東去氣槩
集中惟步蟾宮一闋忽變體爲柔曼之音才人真無
所不可也其詞云一層丁字簾兒底佯繡著花兒不
理別來難道改心腸便話也有頭沒尾蘭膏半滅衾
如水陡省起夢中情事可憐夢又不分明怎得箇從

新作起

秦謙

漢宣帝欲以張安世爲大將軍安世曰老臣自量不足
以居大位繼大將軍後上笑曰君言太謙俗謂人
辭遜者曰太謙太當作泰

鍾學士疏語

同治六年夏大旱鍾學士

佩賢

抗疏請納直言以資

修省有云伏覩近者夏同善諫 幸愔王府第

諭旨稱循舊章以折之倭仁諫修同文館 諭旨

令酌保數人另立一館以難之此二事在 聖心
原有權衡而羣臣遂不無疑惑謂 朝廷開言路之
時而迹似杜言者之口謂大臣盡匡弼之義而轉使
有自危之心臆揣私度未能相喻誠恐敢言之氣由
此沮唯阿之習由此開此臣之所大慮也奏上
優詔容納從繩之風于今爲烈矣

論捻

胡文忠密陳河南捻匪情形一疏有云計近二年來
每年春仲秋季兩次出巢大掠河南本年秋冬將及

湖北之襄陽漢陽德安等府又必擾入陝西山東山西等省再一二年駸駸而及于附畿州縣矣腹心之患此爲最大又云臣非僅爲襄漢等府作自保之計爲憂危之詞也臣極知所言越分特以臣今日言之已無救於河南臣再默而不言則五省均將受害使臣言而不中則固北路五省之福也等語第就河南而推論之全局在掌料事如神僅以知言目公猶淺也

挽陳二山聯

陳二山詩畫兼長而以一衿困場屋曾隨高螺舟觀

察人鑑游琉球後以修志之役歿於西江士林惜之

方雲泉隲挽聯云名士嘔肝修史筆故人揮淚拜羈

魂

咏錢串子

洪洞韓春塘經咏錢串子云出身原自漚麻地一到

人間萬事宜莫怪無端便拋却多因不自有錢時意

涉科諱隨園咏錢云一代帝王留字去萬般人事讓

兄驕咏物抑何顯切

求官詩

于清端成龍

求官詩云書生終日苦求官及作官時
步步難窗下許多懷抱事何曾行得與人看役志功
名人見此必退一步想

女戎

桀之妹喜紂之妲己幽王之褒姒三代均以致亂故
曰女戎洎有明亡而國朝興又屬陳圓圓一人
甚矣女子之繫成敗也迦陵過投金瀨懷古詞有云
覆楚爭誇伍相沼吳又說西施淮陰往事亦如斯成

敗皆由女子其旨深矣

而字

昔聞一試卷文多而字房考批云當而而不而不當而而而而而後已而已而陳丈問雲曰而字如釘鉅然用之當則爲犁地土鬆而秧插矣用之不當則爲擊人迎頭一鉅末有不致死者此論最妙

張文端楹聯

張文端楹聯一云造物最忌者巧萬類相感以誠一云富貴貧賤總難稱意知足卽爲稱意山水花竹無

恆主人得閒便是主人文和公廷玉澄懷園語載有
人集論孟二語云約失之鮮矣誠樂莫大焉此三聯
耐人諷咏

戒洋烟詩

同鄉張琴舫有戒洋烟詩六首漢陽學博徐南墅者
謂有關世道人心刊入文集其詩云海舶連檣載與
俱禍人泥土等金珠阿誰作偏宜無後繼此傳燈實
有徒始爲尋歡成苦趣久思沒計出迷途朝廷
懲典森嚴甚關吏如何有漏租藏嬌合築避風臺高

既經旬戶嬾開涉世早知身是幻捫心甘與汝同灰
殘更落月天將曙冷雨敲窗夢乍迴親故交疎妻妾
怨沉思總覺爲何來髮漸飄蕭眼漸花形骸土木骨
槎枒頻驚下淚同歧路轉笑垂涎爲翹車病久竟無
方可療價高非必酒能賒明明泉壤君尋去萬劫難
迴一念差破忿捐憂引睡魔百年投老此中過昏鴉
片片飛三匝香霧濛濛占一窩舊日家曾炎海住平
生緣結富兒多只愁漏盡鐘鳴後獨抱空囊奈爾何
瓊簫錦瑟并橫陳玉琢金裝考製新到口便醫心上

病行雲頻現掌中身百年有盡先拚命寸鐵無鋒慣
殺人怪底一燈青似豆夜深風雨化陰燐白榻青衾
冷似冰蕭然情味守龕僧簷牙月黑風搖戶屏角聲
低鼠瞰燈寵以專房如愛妾交原同氣比良朋張衡
近日文機澁補作圖經愧未能

李密不矜名節

晉李密常望外轉而朝廷無後命乃遷漢中太守自
以失意懷怨及賜餞東堂詔賦詩末章曰人亦有言
有因有緣官無中人不加歸田明明在上斯語豈然

武帝忿之免密官卒於家密真小丈夫也始終不出
豈非完名全節之人哉世每以其陳情表稱重之表
中不云乎本圖宦達不矜名節是二語者先生自道
也

論士大夫

李少荃爵相以內官論江蘇釐捐事復陳一疏有云
士大夫習爲章句帖括輒囂囂然以經術自鳴攻訐
相尙尊君庇民一切實政漠不深究誤訾理財之道
爲股削妄擬治兵之人皆怙勢顛倒是非混淆名實

論事則好從苛刻任事則競趨巧僞一有警變張皇失措俗儒之流獎人才敗壞因之此最可憂士大夫讀萬卷書每好苛論時政究之坐而言者未必起而行爵相之言非過激也

眞總督

陝甘總督楊忠武 遇春 入覲 宣廟一日 上

忽問曰汝公事之暇尙看書乎對曰臣不識字

上又曰然則飲酒乎對曰臣不善飲 上曰汝將

何以自遣對曰聽打鼓說書 上曰聽說書固好

如公事何對曰錢穀責之藩司刑名責之臬司兵政責之提鎮臣總其成而已 上大悅曰真總督也

禪機聯

查孝廉 伊璜 禪機聯云憑你猜拳是了是了又是了

呖真消息還在別家倩人搔背上些上些再上些 嘔假痛癢總歸自己語云求人不如求己 儒釋一理也

年大將軍詩

年大將軍功蓋一時而詩不多見僅見其題楊紫宸小照一絕云魑魅隨身總等閒肩挑龍虎亦徒然羨

君這副超凡骨不鍊金丹也是仙自是傲岸不羣

胡文忠撰聯

曾滌生侯相之封翁逝世胡文忠挽聯云 帝與

重臣澄清江漢天留大老笑傲扶桑措語莊雅得體

徐樹人中丞

通州徐樹人 宗幹 咏炭句云一半黑時還有骨十分

紅處便成灰中丞以縣令起家居宦海者數十年中間不得差事委署者凡三載所謂人情如紙薄宦情薄於紙者透達極處紛紛肉食之徒見此不啻棒喝

聖人云能近取譬其中丞之謂乎

論流寇

曾侯相嘗有論曰千古流寇無良策夫流寇猶流水也迎而激之逐而搏之則橫決汜濫爲天下患但壅之使不得流賊自涸矣故九江安慶江浙直東等處長圍困賊而賊隨滅皆本乎此

茶亭飯肆聯語

湖湘間有茶亭而售酒者柱聯云爲名忙爲利忙忙裏偷閒喫盃茶去勞心苦勞力苦苦中作樂斟碗酒

來見之爽然又吾鄉泉溪市新開飯肆其門聯云富
似石崇不帶半文休請客辯如季子說通六國不容
賒見之粲然

聖祖賜聯

聖祖賜張文端英聯云白鳥忘機任天外雲舒雲卷青春
不老看庭前花落花開想見主聖臣賢廣誥颺
拜極一時之盛也

北音無入聲

填詞淺說云南曲自有南方之音若遵周氏北方音

叶之則訶龍為東訶玉為御綠為慮宅為柴落為潦
責為哉不為補角為教鶴為號聽者有不掩耳而走
哉許蓮君表兄云北音無入聲惟車夫欲車行之速
則呼曰嘎音同夾真入聲也舍車夫無辨之者予留心
審聽之果信

駱顛門制軍

川督駱顛門制軍 秉章 以同治六年十二月十七日

薨於位崇樸山 實 奏 聞中有語云駱秉章因病在

告每遇邊防有事無不與臣悉心籌畫往返商度至

再至三若思慮不周便覺寢饋難安又云其所以能
得人能制寇之故要皆推誠布公上下相感一時才
俊輩出至今將帥之臣大都駱秉章拔擢而楚軍効
用四方駱秉章所感起而奮興者居多是其勲名冠
一時正不僅川楚士民實身受其福雖婦人孺子亦
皆謳思不絕等語一筆寫來言之出於至誠者也

剔牙籤

道光間蘇州山塘有老夫婦削柳木爲剔牙籤以此
致小康似此物爲古時所無近讀趙文敏詩云食肉

先尋剔牙籤則宋元時已有之矣

黑相公

京伶之冷落者號黑相公好事子咏之云萬古寒酸
氣都歸黑相公打圍何寂寂應局故匆匆飛眼無專
斗翻身卽軟篷忽聞條子到喜色上眉峯有湘蘭者
亦黑流也友人朱君獨賞之大爲稱美後以其呼爲
老頭兒朱遂大愠乃絕之寄來一詩云梨園聲價重
京師南國人來罄旅資夙債已償清興減頭銜博得
老頭兒此語蘊藉不似前作之輕薄也

野戰

上古不尙野戰而尙陣法自楊侯遇春募勇剿賊始
尙野戰而陣法廢今則火器爲先精益求精無過於
洋鎗洋礮是以披堅執銳之士血戰數十年不知陣
法爲何物

湖口昭忠祠

彭雪琴宮保建水師昭忠祠於湖口之石鐘山門聯
云忠臣魂烈士魄英雄氣名賢手筆菩薩心腸合古
今天地之精靈同此一山結果蠡水烟湓浦月潯江

濤馬當斜陽匡廬瀑布挹南北東西之勝景全憑兩
眼收來是謂氣盛則言之短長與聲之高下皆宜

李次青方伯四六

李公元度接統徽州防軍以代張文毅芾甫三日而

軍潰徽郡失守曾侯相恚甚奏請擬正軍法奉

旨從寬戍邊其實侯相深愛其才非果欲殺之也方
伯謝罪稟有云君子原愛人以德覆之而又培之宰
相有造物之權知我何殊生我侯相援筆批其後云
好四六好文章好才情

楊忠武公

楊時齋制軍遇春母李太夫人夢大水泛一紅匣至
中雙鯉一金一赤遂生公迨年十八以乾隆己亥舉
武科後補千總隨福文襄康安出兵文襄令從海公
蘭察學兵法故公一生心折海公每逢大敵夢文襄
必占捷教匪久亂未平有 旨切責將帥威勇侯

額公勒登保奏言楊遇春年甫四十鬢髮半白每於
追奔之際足穿草履縋繩而上將士不可謂不用命
矣屢以戰功擢提督封一等男嘉慶己卯八月

陞見

上見公長髯稱美者再公弟培齋逢春時

鎮曹州

特命出京紆道至曹簡閱營伍道光初

上以先朝勳舊

恩眷尤隆公遂以固原提

督總督陝甘

陞見出都命赴河南閱兵以公子

國楨任豫撫也治回疆平公得畫像

紫光閣

御製像贊云少年從征進不知退拍馬橫矛善穿

賊隊參贊戎機克城賊潰畀以封疆無慚簡在公督

陝甘凡八載務持大綱而不涉煩瑣恪守成憲而不

議更張屢

旨褒爲股肱心膂之臣並

賜有

誼直視如手足腹心句旁

硃批誠然誠然丁酉

二月公薨年七十八

晉太子太傅兵部尙書諡

忠武

御製祭文有云憶蒼髯之矍鑠音容猶在

目前報黃髮以馨香眷念彌增身後功名福壽公實兼之古之郭汾陽今之楊昭勇也

童夫人

龔芝麓宗伯納妾顧橫波

媚

龔仕

國朝當得封典

妻童夫人曰我於前明已受封誥願讓顧氏橫波遂得受 封予謂夫人克兼三善蓋不妬爲賢讓亦美

德而榮膺勝國不欲再受
新恩此中見大義焉
宗伯公能無內愧耶

陶詩

沈歸愚先生

德潛

曰過江以後淵明詩胸次浩然天

真絕俗當於語言意象外求之唐人祖述者王右丞
得其清腴孟山人得其閒遠儲太祝得其真朴韋蘇
州得其沖和柳柳州得其峻潔先生之論鉤其元矣
是謂觀水有術必觀其瀾

四嬋娟

孟東野詩花嬋娟泛春泉竹嬋娟籠曉煙雪嬋娟不
長妍月嬋娟真可憐其辭風華秀艷有古樂府之意
雪嬋娟今本或作妓嬋娟非也昔楊升菴嘗令繪工
繪此爲四時嬋娟圖以花當春以竹當夏以月當秋
以雪當冬後之人亦有此韻事否

椒生隨筆卷三終

椒生隨筆卷四

清泉王之春譔

自警箴

高伯祖中翰公諱光國字梅浦雍正乙卯科中第四
名經魁著有自警箴云勿自足自足自畫勿多言多
言多失勿宴安宴安氣惰勿玩物玩物志溺勿爲詭
異以沽虛名勿矜細行以累大德勿親損友遠益友
勿作無益害有益勿苟安於近小當志乎遠大之事
勿欣戚於窮通當盡其在己之實願以七年之病而

求艾於三年詎可一日之暴而寒之以十日聖學邈如望洋流光疾如過隙揭斯語於齋居用警勉於朝夕辭理樸質凡我子孫皆宜書置座右以爲身世金鍼

十分本事

紀效新書平日十分武藝臨時如用得五分出亦可成功用得八分天下無敵未有臨陣用盡平日十分本事不能從容活潑者諺云到廝打時忘了拿法本事豈易言哉予謂十分本事古難其人八分本事今

無此將戚公殆自信用得五分然以求之近世吾見亦罕矣

勝克齋宮保

同治壬戌勝公就逮赴京道經山西橋頭驛題壁云
豪華豔說五陵遊燕領何人更虎頭百戰雄心馳露
布一時將畧寄風流敢拚直諫扶中葉愧播虛名動
九州四十鬚眉猶未老休嗟李廣不封侯玩其詩意
似有功成者退之象時人謂爲讖語正不如岳襄勤
鍾琪所作只因未了平生業又作封侯夢一場二句

之為含蓄也

香奩雜咏

見詞一卷不知何人作一剪梅送別下闋云莫到臨
邛撫素琴欲向丁甯羞向丁甯但將魂夢伴郎行郎
也登程妾也登程鵲橋仙春恨下闋云愁腸百折雙
眸望斷依舊天涯無信楊花飛去不飛來恰似你一
般情性情詞婉約與竹屋相近

治回良策

正尚亦俊快之才疾惡太嚴終漢之世西域不復與

中國通至本朝聲教覃敷四夷賓服然前烏什大臣
蘇公貪淫釀變遂勞王師自此無西顧憂者又數十
年今則梗化如故大凡回性疑詐其言尤不能信卽
處其同類亦然待之厚則謂人畏己待之嚴則懼人
害己惟以簡傲加之而時施以小惠庶幾生其畏敬
眞治回良策也予昔聞西域土俗每不甚信上年轉
運秦隴遐居邊塞逢人訪證信而有徵其餘泰西各
國異域土俗新疆外藩紀略得之備細

湯海秋銓部

湯公鵬著述甚富才氣橫溢日空一世似不理於眾口歿後曾侯相輓以聯云著書累百千萬言才未盡也得謗遍一十八省名亦隨之數言紀實寫盡其人

林文忠語

侯官林文忠公則徐復起督雲貴時會上論治回一

疏中有但分良莠不分漢回良則雖回必保莠則雖漢必誅使為大臣者均克體公意以措治則滇黔秦隴邊釁永消何致糜餉勞師上煩宸慮耶

閑談可作楹聯

乙亥卽事有人言某君任文事兼武備之權且天分
又高可惜少讀書某君精明果敢可惜太刻予道非
也天分果高必知書中滋味自然篤嗜精明者知其
事之徹始徹終當可而止何必過於搜求苛求太苦
必致自累其身故對云少讀書便是低天分行刻薄
真乃大糊塗擬之作楹聯最佳

觀書穎悟

旅館挑燈檢得漢諸葛武侯誠子書讀至非澹泊無
以明志非甯靜無以致遠句憶少時壯志未除每謂

天下事業功名悉成於動非澹泊甯靜四字所能該
迄今閱歷名場十餘年始悟 國朝用人行政井井
有條無如才高意廣者好事紛更一見施行輒多格
闕不數年仍罷而未罷之前滋擾已甚受害不淺殊
不知大學靜而後能安之義且濃於聲色生虛怯病
濃於貨利生貪饕病濃於功業生造作病濃於名譽
生矯激病故不澹不能明志武侯具伊呂才宗孔孟
學其平生得力處盡此二語允爲後學津梁彼世俗
以術數兵法稱其奇能何見小也偶有所悟援筆記

之童子欠伸報漏已傳丁矣乃掩卷就寢

趙部郎

常熟趙寶齋

林

以進士簽分禮部丙寅年與余同事

澶淵軍中結文字緣爲人堅毅樸質精通史鑑偶作
小詩句必錘鍊而出所謂無一字無來歷也送予赴
秦隴一律云文才兵事兩稱豪局促轅駒愧我曹擊
賊異時聞傅永飛觴此日賴枚皋邊庭好費屯田策
上將甯忘借箸勞別果銷魂休灑淚看君功遂擁旌
旄

黃公疏語

黃勤慤公

錢

歸田後蒙

賞人獲其謝

恩疏語

云老馬尙蒙芻秣朽質難勝暮年已迫桑榆夕陽尤好又云譬寒蟲之蟄處飲膏雨而頓覺昭蘇縱枯樹之婆娑遇春風而亦含生意先輩文字迴不猶人

得人

自古政以人行得人爲要人之賢否高下先觀心術再觀其才識學問如心術之邪者自必不論卽正也而視斯民之休戚時事之得失如秦越之肥瘠漠不

相關縱潔已奉公保守祿位於斯世何補近世名場
可爲浩歎

水龍

天津向多火患城內外救火會凡百餘處每會以水
龍爲主多寡不等原始不可考蓋古無此名也甌北
詩中巽宮樓火之作有云四十三龍救不得掣水五
丈力亦窮自註云救火具名水龍

張江陵

千古權奸私心必有所利若無利欲之念卽不得以

權臣目之甌北咏張江陵云江陵至竟稱賢相只愛
持權不愛財誠爲破的之論考江陵曾孫同敞與瞿
忠宣式耜守桂林同被執幽之民舍兩人賦詩唱和
四十餘日同就戮於風洞山賢者有後理固然也

老頭兒

徐楨卿翦勝紀聞云太祖嘗微行京城中聞一老嫗
密呼上爲老頭兒帝大怒曰張士誠小竊江東吳氏
至今呼爲張王今朕爲天子居民呼朕爲老頭兒何
也相傳乾隆間有人呼上爲老頭子爲上

所聞 上曰何解劉文正公對曰萬壽無疆曰老
首出庶物曰頭父天母地曰子 上粲然觀於一
怒一喜 高宗之度越明祖也遠甚

鏡花緣

小說之鏡花緣是欲於石頭記外別樹一幟者然賣
弄稗販刺刺不休殊可厭也惟女國主壻歸迎母一
表中四語云指白水而重耳歸來猶是山河無恙誓
黃泉而寤生重見遂爲母子如初工雅渾成幾似宋
人佳製

甘肅需次咏

近年甘肅軍務多藉吾楚勇力卽官斯土者亦大半
兩湖人也聞有需次咏云數載聽鼙鼓于今盡蓋鍋
囊中無白鏹地下有黃河飽學將焉用奇勳又若何
不能生在楚只好見閻羅語雖鄙俚然亦足見宦海
之苦時事之艱矣

勝敗

虎鈴經勝敗一則云用兵之術戰勝不可專專勝有
必敗之理戰敗不可專專敗有反勝之道戰勝而敗

者有五急難定謀狐疑不決一敗也機巧萬端失於
 遲後二敗也機事不密三敗也似勇非勇似怯非怯
 四敗也主將不一五敗也戰勝而欲必勝者定謀貴
 決機巧貴速機事貴密進退貴審兵權貴一也勢敗
 而反勝者有四吏士饑渴所愛暗之割所愛者謂在急難之中殺所
乘駿馬愛妾以陷士也眾有飽之用矣吏士恐懼奮身先之眾
 有勇之用矣期應不到殺其所昵所昵者謂所嬖倖或子弟諸姻同在
 軍中若有主守者眾有懼之用矣人有疑惑陰為鬼
 犯命則先殺之也詐鬼詐者謂詐為狐鳴叢祠中之類也或假託卜筮百端不一眾有天之用矣謂

又

卷四

八

天所授也。如是者以敗爲勝也。勝敗之術非勇決神智安能行之耶。所論可謂深切著明而四用皆據前人成效而言。尤非漫爲紙上談者。

秦檜無後

秦檜無後以妻王氏兄子爲子名熺。有才華舉進士。賜狀元及第一人。謂錫山秦氏爲檜後。不知天已斬其祀矣。

軍營積習

朝邑閻丹初中丞。敬銘跋胡文忠集云。吾聞江南未

敗時和鄧諸帥錦衣玉食倡優謔舞其廝養皆賤紈
綉吸洋烟莫不有桑中之喜志溺氣惰賊氛一動如
菌受斧然則固有履危險而仍不知懼者矣如文忠
能幾人哉等語痛揭軍國受病之由近日軍營積習
大率類是

忍

魏無忌忍於執轡而成破秦存趙之功張子房忍於
取履而伸破秦滅項之志張釋之忍於結韉而受全
身脫禍之福古人書百忍於坐隅良有以也予又曰

忍字頭上一把刀如刃刺心其功夫最不容易

廬州人物

廬州人物之盛明初則巢縣有楚國公廖永安虢國公俞通海合肥有蔡國公張得勝無爲有永義侯桑世傑皆著精忠大節今則合肥節相督師以來名將名臣聯翩而起地靈人傑良非偶然

咏太宗

友人咏唐太宗云弑兄殺弟納弟婦此人直無一好處史冊彰彰究何故由來誼辟數貞觀古今人豈不

大誤試看君位篡皇隋功歸於己罪歸父昭陵獻陵
欠分明知望其妻不望其母君不見果報昭然僞臨
朝武此眞是太宗實錄句亦奇崛

傲骨

戴氏鼠璞云唐人言李白不能屈身以腰間有傲骨
然不爲五斗米折腰傲骨孰有如淵明哉陶之傲高
而傲也李之傲狂而傲也謫仙其第二流歟

獨睡丸

稀翁漫筆云獨睡丸是養生良藥然經言八十非人

不暖九十雖得人不暖是養生不必定獨睡九也隨園有曰半生非病不孤眠使獨睡而胡思亂想耗精費神仍爲無益伊川曰坐中有妓心中無妓孟子曰養心莫善於寡欲惟治心實爲萬全之劑能治心矣卽不獨睡亦復何損

慈訓

歐陽文忠母鄭太夫人嘗以崇公治簿求生與祭豐不如養薄之言語文忠勗子以仁孝也北魏高恭之死其妻謂諸子曰自我爲汝家婦未見汝父一日不

讀書昴子以文學也慈訓各得其要以視孟母何多讓焉

祁方伯

壽陽祁方伯宿藻爲春浦相國

寓藻

之弟戊戌翰林

累官江甯布政使性廉正尙風節不失書生面目癸

丑髮逆犯九江陸立甫制軍

建瀛

遁回金陵賊得長

驅而入方伯與陸遂大齟齬正色面詬賊勢日橫陸

困守不出戰方伯憂憤咯血日夕繞案而行咯血升

餘飲其鄉汾酒一巨觥且咯且飲故城未破而身先

殞也惜哉

嚴西園語

吾楚嚴西園先生宦秦作令幾廿年官績循聲治行
第一嘗曰長官之於屬吏必當揚善公廷規過私室
胡文忠稱其言之仁爲長官者宜書紳以自勉焉

臺諫取貌

成化二十一年進士敖毓元應星變求言之疏有云
邇年以來選擇之際皆取其軀體之魁梧丰姿之俊
偉略不問其才識之如何夫惟選卒伍者以強壯爲

尙然則臺諫豈卒伍之地言職豈執爨之役哉我
朝言官非由京察擢陞卽由考取遞補惟大挑舉
人或取儀表耳臺諫言職徒以貌取此明季所由速
亡也

無雙譜補

無雙譜補爲康書臣大令所輯共三十人各綴一詩
題如古樂府然語多奇拗洵可傳也備錄之盜秦判
呂不漂進食歎母王命論新城三公小兒語外黃舍御王
韋歸廝養卒五百人田雛鳳曲上官班師樂趙充神仙尉

梅食粟嘲巨無遼東帽甯管漁陽搗衡當塗識曹文選

樓蕭夜更郎山陰重作后羊酒德頌劉奇而正徐宏

海上客虬髯三俠圖崑崙後庭花嬖伶梅鶴吟林援

桴鼓梁紅冬青樹唐蓮花落兒拒龍操徐達金甌破

補鍋平章僧姚廣忠義旗秦良刺虎行費宮并錄其

至佳之作如五百人云秦漢之際外有趙佗內有田
橫彼高帝者何以王業獨成試看沙中之將多謀叛
海島五百人無一生讀史莫將成敗論若田將軍者
不但仇漢之項羽輸其死即事梁之錢鏐亦不得齊

其名猗歟休哉堯之後有劉謚舜之後有田橫漁陽
搆云鸚鵡一賦便名洲章陵太守爲低頭黃祖之子
能好士乃父真可謂犁牛劉表枉自稱俊物盍加禮
貌委曲留齋送狂生入虎口無怪豚犬失荊州漁陽
三搆忿罵賊荀文若輩皆堪羞假使曹操當時便殺
却豈非三國第一流惜乎阿瞞不肯成人美致令先
生一命徒然休海上客云太原公子氣非常心折人
間自有王項羽比君輸一着不將天下讓劉邦三俠
圖云朱門深鎖重重鎗奴號崑崙大有才十五月明

無犬吠廣寒飛下美人來金甌破云自恨天難補人
皆金底游多君好百姓十族共千秋刺虎行云荆軻
聶政爲人報仇彼男子兮名千秋宮人費氏一女流
女能殺虎斷虎喉可惜大才還小用不得手刃元兇
頭吁嗟乎不得手刃元兇頭閣部拜倒平西羞

楚北無雙譜

書臣楚北人也又著楚北無雙譜共二十六人綴詩
如之而詩之奇峭亦如之博采不易雙絕堪稱亦備
錄如左於菟謠令尹文秦庭泣申包胥吳市簫伍員漁中人

江上滄浪歌滄浪孺子懷沙賦屈原接輿謠楚狂斑衣舞老萊子

山水音鍾子期漆園吏莊周琵琶怨昭君九齡讓黃香耄不輟

漢濱採藥去龐德公一心咒孟宗哀江南庾信江中言張柬之

浣花堂杜甫鹿門謠孟浩然品茶經陸羽泥金帖馮京忠奸辨

張居劾魏書楊漣絕命詞熊廷弼教諭語賀逢聖杖痕斑熊開

元並錄其詩之至佳者如於菟謠云喜愠不形於色

惟存憂國深心雖曰籠中乳虎却含鸞鳳好音子曰

忠矣冠絕古今斑衣舞云歡承膝下斑舞堂前老而

不倦愉色藹然大人者不失其赤子之心者也老萊

子有焉哀江南云北國徒悲新歲月荆州定憶舊田
廬哀江南賦多幽豔惜是昭明未見書江中言云則
天之際可以無狄梁國不可無漢陽梁國雖心乎唐
而死之日尚爲武漢陽雖害于武而死之日已爲唐
惜除惡不盡反受其殃論人者當略其短而取其長
若漢陽王可謂于大節無傷鹿門歌云風流澹遠自
成家放棄歸來豈遂差身隱不逢天寶亂憐他李杜
困天涯絕命詞云可惜復可惜先生絕命
詞首句言之不勝
悲忠臣豈懼死遼事無人爲公死關氣數禍福豈尋

常今雖數百載姓氏有餘芳公昔不遇害豈遂不死乎參透此中意含笑付頭顱更有甚焉者不死更誰譽史官書之曰鑿功老尚書殺我乃成我一時而千秋試問諸賊黨今日尙在不作此相弔慰知非所樂聞名留而事去何以報吾君教諭語云賀公死節不足異不死亦必玉石焚上梁之文非我作異在不入西廡羣此公之高節而人所不聞國亂才難見身修志克勤昔先生嘗曰十年宰相不如七年廣文

三二陸三王褒

晉陸士衡機士龍雲陳陸溫玉琰幹玉瑜宋陸子壽

九齡子靜九淵皆以文衡顯於時號二陸漢王褒字

子淵晉王褒字偉元周王褒字子深三人皆有文學

本朝崑山徐氏同胞三鼎甲錢塘許氏七子登科

兩于成龍同時為名臣尤千古美談也

黎中丞聯

黎簡堂中丞名培敬以名太史督學黔中時苗民逆
命停考多年公按臨所過皆逆苗巢窟調營勇招生
童因勢利導以次收復較前數屆學使之不知兵者

相去霄壤所謂隨陸絳灌兼而有之 天子嘉其
功旋命分藩開府用人行政靡不權衡至當卒以廓
清黔境曾接其言論丰采精明渾厚殊有古大臣風
其撫署廳事嘗自題聯云任百務之紛乘於曲盡人
情之中仍權至理惟一心之默運必克去己私而後
方見大公又人苦不自知願諸君勤攻我短僂去其
太甚與爾民率由舊章兩聯語意鞭辟入裏殊堪矜
式非深於學養何從語此錄之以風有位者

衢州聖裔

衢州孔氏實爲大宗以先墓多在曲阜乃讓公爵於
弟衢宗式微至 國朝登鄉薦者僅一人同治八年
學政徐樹銘請照山東鄉試每科取中四氏學耳字
號三名之例亦編耳字號十名取中一名零數過半
加中一名仍不得過三名定限見邸抄

椒生隨筆卷四終

椒生隨筆目錄

卷五

姜明叔論兵

論法

諭兒輩詩

歸宗駁議

通家

常懷遠

黃堂

帝詩同揆

典史十得

掛印總兵官

百歲老人

官爵相

許乃吳其

信口成對

伯牙臺題壁詩

休甯縣茶亭聯

論部吏

西遊記

隆中武侯祠聯

騎兵

五女皆賢

咏雪美人

張叶箴賦句

內侍

腳色

陝甘近例

先勝

國朝畫家著名

集句詞

女狀元

卷六

俄人取伊犁城

論武漢

王子安善襲前人

金陵城垣考

古今同姓名人

多忠勇公

論三督撫

魯竹亭詩

癡人莫若英雄

走作

詩文集

消息信息

題畫松

詠被中繡鞋

曲成人才

丹心萬古

春秋屬辭辨例

臘底庚申

直隸水災

鑄奸

海運

箴言

電報

毛詩註

怪魚

老萊子

罌風匣

地形如肺

林白蘭等
自金

四

椒生隨筆卷五

清泉王之春讓

姜明叔論兵

姜明叔蕉簷曝背臆記中論兵十七條頗能卓有所見爰錄其七俾世之讀書而知兵者共欣賞也 或問將曰三代之將其上伊呂其次方召皆聖賢之徒也春秋之將亦多儒者自戰國以下皆戰將矣惟漢之趙充國諸葛亮晉杜預唐李靖宋劉錡知書觀其用師亦異乎諸將矣有其責者宜何取法 或問諸

葛武侯明申韓有諸曰有之爲將者必法孫吳法孫
吳必明申韓明申韓必尙黃老子武侯見之矣噫後
世不能純乎三代之師者以此 或問今天下一家
所慮者夷狄耳彼旣不免侵軼則將何以應之曰周
伐玁狁逐之盡境止焉其伐荆蠻亦曰威之使服而
已此上策也無奇功無暴師不以病民爲尙後世得
方叔召虎尹吉甫爲將則中國可以久安長治矣曰
衛霍何如曰當中國之方盛值夷狄之始衰制之無
不得意也一勞永逸之說窮黷之飾辭耳非三代聖

主之軌 或問將曰漢之漢壽亭侯曰義而正宋鄂國武穆王曰仁而正唐李西平曰忠而不伐後世之將如三子者亦可謂名將矣惜乎達機則未也孰見機留侯尉遲鄂國韓蘄王近之矣 自古帝王漢高祖善將將唐太祖善將兵項羽曹操將也百戰百勝故不能有天下唐太宗臨危制變料敵出奇此借前人之言而評魏武也然帝王之知用兵者莫如太宗以其習孫吳而知奇變也魏武其匹乎 或問西漢之臣善用兵者曰莫如董公惜其不爲高帝用其次

則子房其次陳平平全用吳起權計高帝之取天下非三人之籌畫莫之能一韓信以下皆戰將也其識取天下之樞者此三人焉 或問旌旂金鼓曰一軍之動靜進退全倚乎此旌旂以萬人之目爲一人之視金鼓以萬人之耳爲一人之聽然不欲多旂多則易亂鼓多則易衰在隨機應變用之何如耳

謚法

謚法以文正爲最優 本朝謚文正者六人湯公斌劉公統勳朱公珪曹公振鏞杜公受田曾公國藩論

功勳惟曾爲最如文恭文端亦謚之美者得此謚者
恆多文忠本不多見近則謚文忠者凡數人然惟林
公則徐胡公林翼爲副其實耳忠武二字亦優楊公
遇春其矯矯者軍興以來又若習見不珍而塔公齊
布李公續賓固不讓前賢也靖節自淵明後罕覩之
裕魯珊督部謙竟獲此謚削而復予他如文介一謚
則僅浙杭馮小亭光祿培元一人而已趙丈雪門鉞
前有國朝謚法考一書上歲彙集一部添補不少
頗屬詳備

諭兒輩詩

明仁和訓導臨川聶大年壽卿諭兒輩詩云四兒五
歲六兒三莫與肥甘習口甜清白傳家無我媿詩書
世業要人擔兩餐淡飯何須酒一筓黃齏略用鹽聞
說有人曾餓死算來原不爲去聲官廉此詩予最喜之
可與陶公與子儼等書同誦

歸宗駁議

江南提督李朝斌本姓王氏襁褓中爲李氏父母撫
養鞠育至於成立王氏本生父母隔絕不相聞問事

隔四十三年同治丁卯三月間有善化人王正儒赴江督曾侯處稟稱李朝斌係所生季子請復姓歸宗侯相詢之李則固茫然也卽議駁爲告於朝其疏語有云查本朝言禮之書尙書秦蕙田所纂五禮通考最爲詳核其於異姓爲後之事反復辯論一以原情爲主所引金史張詩一事詩本李氏子育於張氏閱三十年始知之初議歸宗終以張氏無子遂仍其舊秦蕙田稱張詩爲孝今王氏本生之父母有子三人而李氏撫養之父母別無立後正與張詩之事

相類伏查定例出嗣之子歸宗亦以所繼父母有無子嗣爲斷若令李朝斌歸宗則在王氏本生之父母不過於三子之外又增一子而在李氏撫養之父母竟至斬焉不祀撫子者必抱恫於九泉爲子者將難安於畢世核諸古禮參以今律李朝斌應於李氏別爲一家但後其撫育之父母而不祧其以上之祖宗於王氏則不通婚姻一以報顧復之深恩一以別族屬之大義庶乎兩全之道等語引證確切辯論簡晰古人有言曰宰相須用讀書人信哉

通家

魏夏侯霸之入蜀也邀夏侯玄欲與之俱玄不從及
司馬懿薨中領軍高陽許允謂玄曰無復憂矣玄歎
曰士宗卿何不見事乎此人猶能以通家年少遇我
子元司馬子昭不吾容也卒與李豐之難今稱
故舊爲通家本此

常懷遠

厲樊榭先生有開平王孫種菜詩序云常延齡字喬
若號蒼谷開平王遇春十二世孫襲封懷遠侯官南

京錦衣衛指揮有賢行曾疏劾馬阮鼎革後與夫人

徐氏

中山上公之愛女

種菜於金陵湖墅裔孫執桓乞詩中

有句云幾稜荒畦非賜田晚菘早韭資寒泉可憐一
紙鋤奸疏卻裏長街賣菜錢讀此可爲墮淚

黃堂

黃堂太守所居猶三公之黃閣也緡素雜記天子曰
黃闈三公曰黃閣給事舍人曰黃扉太守曰黃堂見
姑蘇志或謂黃堂卽吳郡廳事乃春申君之假殿後
太守居之以數失火塗以雌黃遂名焉天下郡治昉

此又謂以黃歇之姓名堂者二說皆非也

帝詩同揆

漢高祖大風歌有云安得猛士兮守四方唐太宗春日元武門宴羣臣詩有云庶幾保貞固虛己厲求賢聖祖放鶴亭詩云處士人何在山前夕照來亭空不見鶴磴古尚留梅楊柳縈烟嫩棠梨帶雨開今朝閒繫艇還是愛賢才 聖君哲主其拳拳好士之思古今同揆

典史十得

嘲典史者有十得焉真堪捧腹然所指乃南方典史若北方不能有此威福也其語曰一命之榮算得兩根竹板拖得三十俸銀領得四方地保傳得五下嘴巴打得六年俸滿報得七品堂翁靠得八十養廉借得九品補服僭得十分高興不得

掛印總兵官

前明以公侯伯都督掛印充各處總兵官如宣化曰鎮朔將軍大同曰征西前將軍延綏曰靖虜副將軍甯夏曰征西將軍甘肅曰平羌將軍之類文皆柳葉

篆無將軍名者皆壘篆文 本朝仍明之舊而損益之掛印總兵官凡九缺宣化大同延綏陝安涼州甯夏西甯肅州臺灣近又添設皖南一鎮共十鎮有掛印之名無將軍之號卽事權亦較遜焉

百歲老人

遵化州紳耆賈孝維老人年已百歲一日因公來營矍鑠自如譚餘遂叩其養生之術笑曰治下少時酒色不自檢頻年習苦無能安養惟一生不亂操心不煩惱中年後晚間少食早起早臥而已涇陽李赤腳

之言曰飢來卽食食後靜坐其卽此道乎

官爵相

官秀峰爵相文起家步校勲業品望海內寡儔其局量寬洪有婁公師德之度胡文忠嘗云秀峰宮保寬仁博大推誠待人實能主持東南全局其器宇度量有舍己從人之概又云揆帥寬仁博大近時所獨出實可遙總兵事不致我軍掣肘者若易以他人則不能如此之昭合無間矣蓋成文忠者爵相而知爵相者文忠也

許乃吳其

嘉慶道光間有錢塘許乃固始吳其對語以許氏吳氏科第接踵而乃字其字輩尤極其盛也今則許吳二姓科名少見不如曲阜之孔任邱之邊福州之林矣

信口成對

明成祖召解縉以色難二字命對縉曰容易久之成祖曰汝奚不對縉曰臣已對矣成祖大笑乾隆間簡玉亭吏部昌璘飲柯給事瑾宅爲子約婚託柯爲媒

而柯嫌其禮物率略笑曰居簡而行簡簡以手指曰
執柯以伐柯一坐蹶然阮文達直南書房時
高廟問曰伊尹二字何對文達曰阮元上大悅此
皆信口成對也

伯牙臺題壁詩

宋芷灣觀察伯牙臺題壁詩云噫嘻乎伯牙之琴何
以忽在高山之高忽在流水之深此曲不傳愁我心
噫嘻乎子期之聽琴何以知在高山之高知在流水
之深古無文字直到今是耶非耶相逢在此萬古高

山千秋流水壁上題詩吾去矣丹徒羅耦廉茂才有
伯牙臺聯云流水清音鍾子期悠然入耳廣陵絕調
嵇叔夜同此傷心寫作均有奇氣且音韻與琴操相
合足與坡公醉翁吟並傳漢商姚姓修臺時刮去之
俗物可恨

觀察名湘
粵東人

休甯縣茶亭聯

休甯縣大道旁茶亭聯云南南北北總須歷此關頭
且望斷鐵門限備夏水冬湯應接過去現在未來三
世諸佛上天下地東東西西那許瞞了腳跟試豎起

金剛拳擊晨鐘暮鼓喚醒眼耳鼻舌心意六道眾生
喫飯穿衣誦之如談家常如參禪偈

論部吏

胡文忠公云 大清律易遵而例難盡悉刑律易悉
而吏部處分律難盡悉此不過專爲吏部生財耳於
實政無絲毫之益夫疆吏殫竭血誠以辦事而部吏
得持其短長豈不令英雄短氣乎又云六部之胥無
異宰相之柄予謂條例日繁弊端日甚公之論部吏
蓋深有慨也

西游記

西游記一書人多以小說視之其實乃道書也中有
奇語云扭出錢中血又云手挽虛空結又云靈龜吸
盡金烏血細心潛玩於丹道思過半矣相傳此書爲
孝子所撰其父閱畢而痼疾愈似較水滸紅樓夢之
奸盜邪淫高出百倍

隆中武侯祠聯

丙寅冬予道出襄陽曾爲隆中之遊山水自佳而丞
相祠堂毫無點綴道士均俗不可耐聯額甚夥殊少

佳者僅記一七字聯尚穩貼其句云臣心未了三分
國天意難知五丈原

騎兵

孔穎達曰古人不騎馬故經記正典無言騎者戰國
時趙武靈王謀胡服騎射以教百姓李牧日擊數牛
饗士習騎射迨後漢高祖得梟騎以灌嬰爲騎將而
項羽敗光武得突騎曰今日觀突騎之戰樂何如也
以此觀之騎兵蓋始於戰國而精於兩漢耳

五女皆賢

後漢戴良字叔鸞五女皆有隱者風每許嫁練裳布
被竹筥木履以遣之唐貝州人宋廷芳生五女皆警
慧善屬文德宗召入呼女學士其第四若憲有催妝
詩千古流誦五女皆賢竟有其偶

咏雪美人

嘗見咏雪美人詩不著姓名摘其佳句云顧盼幾回
呼月姊安排恰好倩冰人多露畏行聊小住迨冰未
泮是佳期漫道如花多薄命紅顏也有白頭時刻畫
處饒有情韻

張叶箎賦句

張叶箎明經

炳

才名藉甚慳於一第記其郭子儀七

夕遇織女賦押自字韻句云此卽是金書鐵券願將
軍異日無忘俄焉而碧漢紅牆問帝女歸雲奚自可
稱冰雪聰明

內侍

本朝鑒前代之失嚴抑內侍真千秋良法也同治庚
午之秋太監安得海私自出京沿途招搖爲山東德
州知州趙新稟揭經中丞丁公寶楨拿獲奏明奉

旨將安得海正法跟隨私逃之太監陳玉祥李平安
李得喜郝長瑞李順計得壽均絞決假充前站官之
黃石魁田兒及鑣丁韓寶清戴登雲何林高振邦劉
鳳喜一併正法蘇拉金安信劉交瑞劉凱黃廣喜跟
隨蘇拉之張瑞僧人廣文家屬安得邦安馬氏均發
黑龍江給披甲爲奴並將八月十一日九月初九日
諭旨載入宮中現行則例又以太監王天福爲
安得海經管家務亦卽處絞 命下之日臣民欣
服

脚色

唐元宗呼梨園子弟有生日淨丑末貼旦老旦小生外八項脚色生者言此戲文由此生起也旦者曉色未分之時以男裝女暗昧難分也外脚色者乃外之人演其事也末者對始而言先出開場而謂之末反言也淨者對污而言塗面不潔而謂之淨亦反言也丑與醜同音言其陋也其餘脚色以人少不能數衍又副以全之且加雜以成之

陝甘近例

同治八年五月二十七日奉 上諭左宗棠奏遴
員署理府州縣各缺請勿拘成例一摺甘肅慶陽一
帶地方甫經收復辦理賑墾撫輯事宜均關緊要該
督遴才委任自係爲地擇人嗣後陝甘兩省委署實
缺著該督撫斟酌情形變通辦理等因近日入宦途
者於善地則趨之若鶩於窘鄉則畏之若鴆 朝
廷爲政在人蓋有不獲已之苦衷焉

先勝

虎鈴經云孫子曰勝兵先勝謂先定必勝之術而後

舉也何謂必勝許洞曰先務三和次務三有餘次務三必行何謂三和曰和於國然後可以出軍和於軍然後可以出陣和於陣然後可以出戰何謂三有餘曰力有餘食有餘義有餘何謂三必行曰必行其謀則奸機不成必行其賞則好功者不愛死必行其罰則有過者不歸咎是以知善務和者公無私捨小惠務大惠善務有餘者力諸事而不自怠善務必行者興勇斷去猶豫之謂也舉是九者務令預定之於前則萬變千機然後動乎其中矣率此以禦敵未有不

勝者也故曰勝兵先勝者勝在我也其在易曰先天不違之義也子謂此九者足以操必勝之權其餘陣法兵制皆枝葉耳

國朝畫家著姓

國朝畫家著姓載於畫徵錄者王氏凡二十五人時

敏煙客太倉撰煙客諤山陰士子毛柘鑑元照煙客

州太守時鐸尚書諡文安官崇簡敬哉宛平人含光

呼王廉州有年硯田金武勤中吳人諸生文翬石谷

官參政人概安節本名汶秦州禧丹徒式無倪太

士徵榮人吳人概秀水人汶秦州禧丹徒式無倪太

樸玉樵保鑄魯公太巘補雲吳原麓臺煙客之敬

銘丹思嘉定昱日初麓德普長民秀水釋宏瑜月章

名化霖會稽人閨秀端淑錢映山陰人適次張氏凡

前明中書舍人十四人宏君度穆鐵橋東琦玉可嘉遠子游海風大

上元人前篤行內恂秦中晝研山長漣南垣華子畏

武進人憚欽石樓秦州人鵬南華嘉定寶華以字

南田甥他如周氏吳氏亦各十餘人豈翰墨因緣獨

在此數姓歟

集句詞

荆溪詞所選集句詞以萬君樹董君儒龍各作為最

佳錄萬之浪淘沙初度云一隻木蘭船孫光憲離恨綿

綿花蕊夫人落花飛絮雨翩翩歐陽修歸去江南邱壑處劉

倫斗帳高眠張孝緒家在綠楊邊顧茅舍山前劉惹窗

映竹滿爐烟歐陽炯舊事悠悠渾莫問盧祖昇四十三年

疾辛棄疾江城子寄內云蕭蕭江上荻花秋無名氏水悠悠

昇黃昇思悠悠李景移過江來僧飛夢到揚州晁補之芳草連

天迷遠望周邦彥官驛水陸柳枝愁史達庭槐影碎被

風揉吳淑晚風留蘇軾夕陽洲蔣捷簾幙輕陰馬偉

風揉吳淑晚風留蘇軾夕陽洲蔣捷簾幙輕陰馬偉

又三首
五
五

入高樓李白涼月去人纔數尺王安石應念我李清照不擡

頭牛峤董之如夢令春閨云燕子來時新社晏殊耿耿素

娥欲下周邦彥四合裊金鳥秦湛時落銀燈香爇李睡也

睡也繡被春寒夜夜史達祖虞美人閨夜下半闌云月

高猶在重簾下潘元質春事無多也劉仙倫暖風吹動繡

簾鉤許白陽別是一般滋味在心頭李煜信手拈來都成

妙諦矣

女狀元

女侍中魏元義妻也女學士孔貴嬪也女校書唐薛

濤也女進士宋女郎林妙玉也女狀元王蜀黃崇嘏也而此數女中以女狀元爲最元人有春桃記蓋黃事也其劇目載輟耕錄今不傳矣蓋崇嘏臨邛人作詩上蜀相周庠庠首薦之屢攝府縣吏事精敏胥役畏服庠欲妻以女嘏以詩辭之曰一辭拾翠碧江湄貧守蓬茅但賦詩自服藍衫居郡掾永拋鸞鏡畫娥眉立身卓爾青松操挺志堅然白璧姿幕府若容爲坦腹願天速變作男兒庠大驚具述本末乃嫁之余竊謂女子有才固可貴而白龍魚服以女爲男未免

可怪因以兩紀詠之云好春不露女中豪略似花中
夾竹桃多少男兒應媿煞不筭進士邁英髦又玉質
冰心有木蘭始終完璧古來難狀元亦有金龜婿枉
說讀書人做官一美之一怪之也

椒生隨筆卷五終

椒生隨筆卷六

清泉王之春編

俄人取伊犁城

同治十年五月十七日俄羅斯人取伊犁城有
旨派將軍榮全馳往查辦憶咸豐十年間俄人以洋
鎗等物求易鴨綠江外地七千餘里 朝命允之
遂啟今日攘伺之端積慮處心非一日矣

論武漢

胡文忠陳湖北吏治兵政一疏有云荆襄爲南北之

關鍵而武漢爲荆襄之咽喉武漢有警則鄰疆震驚
南服均阻控制失宜本根先撥云云論得其要厥後
東南底平皆藉乎此是誠高屋建瓴也

王子安善襲前人

王子安善襲前人如滕王閣序中層臺聳翠四句全
襲王簡栖頭陀寺碑文層軒延袤上出雲霓飛閣透
逸下臨無地又落霞與孤鶩齊飛二句亦襲庾子山
馬射賦落花與芝蓋齊飛楊柳共春旂一色相傳滕
王閣下夜有鬼苦誦落霞二句客舟爲之不安一文

士過而聞之叱曰此等蹈襲文字且與字共字可刪
未見其佳何必喋喋自此寂然今之勦襲舊文而自
鳴得意者可以爲戒

糊塗粥

板橋書有云暇日咽碎米餅煮糊塗粥雙手捧碗縮
而啜之霜晨雪早得此週身俱暖此言頗形窮象然
君子固窮顏子簞瓢陋巷樂在其中此非安貧樂道
者不能言也

熬陽題壁詩

罄陽旅店有白下女士柳眉卿題壁二絕句云飄零
薄命恨緣慳旅館淒涼百不堪每憶故園諸姊妹一
燈飛夢到江南鉛華不御鬢鬆鬆消瘦形容鏡影中
綠遍垂楊青遍草教人一路怨東風哀豔風流必非
偽託

陰曹門聯

閣學周苻農師嘗夢至陰曹見一極大衙署其門聯
云百善孝爲先論心不論事論事世間無孝子萬惡
淫爲首論事不論心論心天下少完人按兩首句本

是倒語深入一層卽律重誅心之意極其透徹

疏語沈痛

道光癸巳林文忠撫蘇時以水災疏請緩徵中有語
云晝見陰霾之象自省愆尤宵聞風雨之聲難安枕
簞又云惟求 恩出自天多寬一分追呼卽多培
一分元氣言之沈痛

三元

古今三元祇十二人唐張又新崔元翰宋孫何王曾
宋庠楊寘王巖叟馮京金孟宗獻元王宗哲明商輅

國朝錢棨陳繼昌順治初有武三元王玉璧獨陳

蓮史

繼昌

人雖呼爲陳三元然其銜牌曰四元及第

則朝考亦第一人也蓮史每試皆首列故常用之
小印云生平不作第二人想又一印云古今第十二
人夫以歐陽文忠與王文恪之才僅得其兩元而大
魁竟失榮名豈易盡占哉

傷亂詩

兵勇擾害甚於賊匪見賊不戰統帥者漫無紀律而
誇功則郭李不若也地方官吏聞驚卽遁賊退則以

克復城池免罪窮民不能安業應募爲勇遂成廢類
市井無賴有邀薦剡而真才淪落可勝慨乎船山太
史寶雞題壁句云民窮轉覺軍前好寇過惟從壁上
觀山中城破官仍在闔外兵譁將不聞大賈隨營緣
戰富連村無寇是誰焚能文未易參軍事有口都能
說戰功攘劫翻誇裨將勇需求誰諒縣官貧不明賞
罰終何益眞舉才能尙未遲雖云傷亂亦實錄也

示逆靈兆

闖賊入京射大清門不中因以喪氣白蓮教首冉天

元入梓童時往文昌廟求籤有一人入都之語未幾
 為德參贊楞泰所擒囚送成都擒逆張總愚由晉北
 犯順號於眾曰戊辰正月初五日破京城御太極殿
 受賀初五日至保定境詢地名土人以大級店對語
 音似太極殿賊嗒然乃不克振示兆靈驗一若有意
 為之者

絕對

絕對如小老虎柳下惠風和之類可謂寡偶惟月月
 紅有人對以星星翠烟鎖池塘柳對以燒埧鎮海樓

蓋適值鎮海樓災偶句僅藏五行而已字面實不對也又荷葉露珠柳線松鍼穿不住友人對以雁峯瀑布鶯梭燕剪織難成真銖兩悉稱矣又在河南撫署見書屋壁間二語云貓臥墻頭風吹毛動貓不動綴其後云有對此者酬以文房四寶同人苦思竟不能對

三聲

有人出守荊州謁某道卒然問曰聞貴府有三聲謂圍棋聲鬪牌聲唱曲聲知府徐徐應曰下官聞公亦

有三聲道詰之曰算盤聲天平聲板子聲迨知府竟以此解任今爲某府之三聲未有不註誤本官爲某道之三聲未有不得意者也噫

爲令八難

朝邑李桐閣孝廉 元春 作爲令八難論其難有八曰

到任難事上難馭下難賦役難理教化難治訟獄難
平災旱難恤盜賊難除到任難惟自苦約耳事上難
謹慎以奉之積誠以感之耳馭下難悉心以察之親
民以辨之耳若夫賦役之難既自苦約不任在上之

苛求不致在下之盜竊自可取之有制卽不盡如古
然寬一分則民受一分之福己亦自減一分之罪教
化雖難身帥之勤諭之嚴懲之因俗爲禮諒亦無不
從也平獄訟無他可息者諭之使息否則判以情理
讞以律例當嚴則嚴當寬則寬不自受賅而又不信
胥役不淹聽斷斯爲得之恤災旱無他緩催科發倉
廩散貸平糶實心救援諸弊自絕而酌行古人之法
其中惟勸捐爲善切禁勒捐周禮安富意正爲此而
保甲則治盜賊之善法治盜賊卽治囑嘍惟患民間

不實心奉行則法雖存而實亡爲令者能盡心糾督盜賊雖難除而無不可除亦如于青天之於魚殼矣令又何難爲哉其難焉者吾直以爲非令也博士倚席不講但責禮於諸生其負職猶之令也此論頗爲詳盡

戴文節面奏語

文節畫名高天下咸豐初直南書房上命其講授畫法文節面奏曰方今四方多事上正宜究心治平之道繪事末技不足學也時論稱其得體

北人好食葱蒜

南人惡食葱蒜北人好食葱蒜土性然也而葱蒜亦以北產爲勝直隸河南山東等省無論富貴貧賤之家每飯必具最可恨者車夫與剃頭匠耳趙甌北舒城旅店題壁詩有云汗漿迸出葱蒜汁其氣臭於牛馬糞蓋亦深疾之也今以二八女郎偶一吹氣不可嚮邇頗有西子不潔之歎

保甲

王荆公作事乖謬惟保甲一法千古不敝王文成兼

行十家牌卽周禮五人爲伍十人爲聯之意然舉辦保甲宜先令鄉約查報再着親信人確查覆核按季銷補不特緝盜之良規抑亦聽訟之一助目今虛應故事耗費紙筆可勝慨乎

短掛戰裙

短掛戰裙古無其制惟短掛略類短後半臂戰裙則羌無故實矣趙松雲先生咏之短掛有云褻袂雙非隻明衣一可三焦僥如著此或尙覺麤麤戰裙有云何須白練製略並錦鞵長衣反居裳內男偏女作裝

似此咏物真是不爲題窘

鬼教

北魏明帝時李陽爲高陽王雍友以時人多佞佛言沙門爲鬼教沙門都統僧暹等以陽謗佛法泣訴於靈太后太后責之陽自理曰鬼神之名皆是通靈達稱佛非天非地本出於人名之爲鬼臣爲非謗宋張天覺欲作無佛論妻向氏一言而止後又作護法論聖人云敬鬼神而遠之最是正理

選兵良法

紀效新書云第一選人以精神爲主而當兼用相法必無兇死之形重福氣之相最勿使伶俐油滑甯用鄉野愚鈍鄉野愚鈍之人畏官府畏法度不測我顛倒之術誠信易於感孚愾氣易於振作又云使威嚴之永行無阻壞者恩與信也如載人者舟之功而所以使之載者舵也威嚴其舟乎恩信其舵乎又云武藝尙可教習必精神力貌兼收三者兼收又不若憑各親識鄉里哨隊長舉首蓋渠皆生同里閉觀其所忽也久矣此又不可憑選者之目也云云實爲選兵

良法今之紛紛召募者講求及此則思過半矣

少年科第

少年科第最爲人生愜意之境杜老有句云只今年纔十六七射策君門期第一白香山登第詩云慈恩塔下題名處十七人中最少年時年二十七不甚早也寇萊公十九舉進士時太宗取人多問其年年少者往往罷遣或教公增其年公曰吾初進取可欺君耶然總不如苗台符張讀之早苗年十六張年十七同及第所謂一雙新進士兩箇阿孩兒也商子華

亮

以十四舉孝廉賈蝸氏 中黃 以十五舉進士乃科第

之至早者 國朝侯官林廷禧於道光辛卯登賢

書癸巳捷南宮年才十六房批有云九歲遊庠駒齒

有神童之目五年食餼鰲峯兼都講之名爲二百年

來科名盛事

邑令宜爲循吏

姜明叔曰邑令乃字民之官關係重甚魯論一書吾
夫子獨丁甯於爲宰爲令之戒而他職不與焉實以
得百里而君之乃斯民休戚之寄故曰可以寄百里

之命宋林德崇父與監司啟有云鳴琴堂上將貽不治事之譏投巫水中必得擅殺人之罪劉潛夫宰建陽亦有一聯云每嗟民力至叔季而張弓欲竭吏能恐聖門之鳴鼓曾滌生侯相督畿疆時撰聯勸屬吏云無日不以龔黃召杜相規願諸君力行古道斯民正當水火刀兵之後賴良吏默挽天心甯爲循吏毋爲能吏爲令者宜自審焉

黃太守

同治九年十月黔撫曾璧光奏道銜候選知府黃德

裕湖南乾州廳拔貢由教職累以軍功擢知府投効
貴州署都勻府事八年六月萃安軍營飢潰苗匪攻
城糧盡援絕十一日城陷死之請援前守鹿丕宗例
予謚建祠疏語有云黃德裕從征南北屢立戰功
去夏委署都勻通飭各屬講求吏治辦理團務轉運
軍糧規畫周備乃以萃安營潰賊逼郡城外無片甲
寸鐵之援內無粒米銖金之積殺馬饗士爲國捐
軀大節凜然較鹿丕宗爲烈云云同殉者有總兵王
松林等十五人其弟德威並請附祀予謂烈則烈矣

而循績不及鹿公餘則大致略同耳

百歲壽母賜果圖

李桐閣舉道光庚子孝廉有孝行時導母出遊嘗觀

劇鄰村母年九十七八桐閣亦近七十親送饌歌架

下擁擠莫進高呼曰媽

俗呼母曰媽

人哄笑曰此翁鬚盡

白尙呼媽也桐閣應曰予有媽焉得不呼笑者又哄

然及母百歲旌下桐閣作百歲壽母賜果圖蓋屋路

閩生太史

德

題一長古云世間奇事真咄咄母也朱

顏兒白髮朱顏白髮懽相依一家四壁恆春暉使母

生大賈終歲營營爲阿堵使母生貴官出山遠志還
山難壽母有子爲人師生徒濟濟環堦墀出擁皋比
據上座入受甘旨猶嬰兒母昔蒸麩和野蔬今也問
字之酒束脩之羊羅滿厨昔鬻簪珥爲兒買書兒今
讀破萬卷爲通儒葛巾蕉扇侍母側繪出寒門消夏
圖兒年雖邁童心尙在仙桃一顆遙相投王母不待
東方偷對母大嚼母色喜豈惟護草能忘憂陸郎懷
橘夙所欣潘岳捧輿安足論孩提時事不可憶垂老
猶荷慈母恩垂涎者誰兩旁立竊語時復聞曾孫曾

孫男曾孫女欲分甘母不許寫得情事俱到佳話不可無佳章以傳桐閣雅負盛名著朝邑縣志

河套

姜明叔剔齒閒思錄云陝西西安綏德之境有黃河一曲俗名河套其地約廣七八百里北虜時竊入其中居久之乃去葉文莊公盛爲禮侍時嘗因言者欲築立城堡耕守其地奉命往勘大意謂其地沙深水少難以駐牧春遲霜早不可耕種其議遂寢近時關中大饑流民入其中全活者甚眾踰年纔復業則是

非不可駐牧耕種也今聞虜居其中皆長子孫邊將不復逐去之縱不能爲患然侵盜之事難保其必無也云云按此在北山境內其土脈之腴厚不及蒙古新墾之地然前數年屢爲土匪巢窟可稱遠見

鄧侍御疏略

同治九年閏十月鄧侍御慶麟奏州縣實缺人員務當飭歸本任不得率行更調聽斷必期明速請飭仿會國藩考課功過章程辦理編查保甲嚴懲滋事散勇收押放押人犯照丁日昌合州縣懸掛粉牌之法

以杜濫押訪拿訟棍買補常平倉穀開墾荒地修築
陂堰釐捐須杜中飽至帝王之學必以敬天愛民爲
本等語蒙 上嘉納謂其措意詳到均有關於國
計民生然內有云有不煩瑣陳者有言之無益者如
我 朝歷聖相承上下胥格其州縣應爲之事各
省長官頗嚴考核此不煩瑣陳者如買補倉穀開
墾修築費從何出卽保甲亦具文而已此言之無益
者也則以侍御苦心孤詣等於老生常談惜哉

帶肚

同治九年四月宋侍御邦德敬陳管見一摺中有云
又有二種長隨名爲帶肚家人當本官未經得缺之
先常代借銀兩並言明得缺後卽派充門丁需資人
員往往嗜其小利一經任用則蒙蔽招搖無所不至
本官受其挾制平民被其訛索實堪痛恨等語近日
宦場枯窘求帶肚而不得者多矣遑云嚴禁耶

首山

臨榆卽山海關雄秀無匹邑之名勝以角山澄海樓
爲著而不如首山之入畫也山有樂壽可琴二亭前

臨平野野盡而海後則峰環水曲瀑聲潺潺樵唱漁
歌疑涉仙境畿東之勝在榆關榆關之勝在首山同
治十一二三年予充通永練軍馬步翼長每屆冬令
領兵由北塘至永平一帶巡道關口輒往遊歷流連
忘返

八仙

八仙由來甚古予竊以爲傳會否則成仙者夥矣而
何以此八人者既無散期且無增減豈仙家亦有黨
耶考其事跡所說不一一曰鍾離權

字君房晉周處
裨將終南山遇

東華真二曰呂嵩字洞賓唐時舉進士不三曰張果

人得道隱恆州中條山召授銀青四曰曹國舅丞相彬子皇

光祿大夫天寶時尸解零陵市人女呂嵩以桃與之食半得

得五曰何仙姑不飢老而尸解又稱姑以開元中羽

道化合在六曰李元中開元大歷間人學道終南陽神

純陽前起殍而七曰藍采和衣破藍衫黑布腰帶足一跌一鞞

至濠梁擲鞞帶醉則持三尺大拍板為踏踏歌後

拍板乘雲去八曰韓湘頃刻花於瓣中示昌黎以

字後昌黎謫潮州至藍趙甌北云戲本所演八仙不

知起於何時按王氏續文獻通考及胡氏筆叢俱有

辨論則前明已有之蓋演自元時也其詩有云韓湘

張果呂洞賓此外載籍無其人由來仙成本荒幻何必捫籥求其真天下都散漢竟作時代看鐵拐無姓李或言劉跛子趙家外戚傳不聞曹僧能修煉藍衫老采和丈夫忽變作嬌娥又況何始愛酬答偏與羣眞坐聯榻仙家想是無凡心不妨男女相混雜故作諧語而視等無稽之意自見矣

司字平仄均用

也應愁殺杜司勳是司字本從平也而漁洋詩有落魄江湖杜司勳之句司字自註入聲按漁洋喜白樂

天之爲人蓋本諸白詩耳嘗考容齋隨筆云白樂天
好以司字作入聲讀如云四十著緋軍司馬男兒官
職未蹉跎一爲軍司馬三見歲重陽是也王懋野客
叢書謂白詩司字非入聲乃去聲耳廣韻入聲不收
集韻去聲伺字韻收曰司至也今韻書在支字平韻
者曰主也在寘字去韻者曰與主義通總之平仄均
可用而仄音當以去聲爲是

顧亭林徵君

汪彥石獻珩題顧亭林像詩小序云昔王半山非馬

史孔子世家而近儒錢潛研亦論宋史拗立道學傳之非其言曰史學之例凡道德文章顯著者各有專傳其列於儒林文苑者皆其次焉者也孔子與七十二弟子史記未嘗列於儒林也漢之董仲舒唐之韓愈皆自有傳元儒無出許衡吳澄之右者亦自爲傳愚以爲周程張朱五子宜合爲一傳自五子而外則入之儒林可矣又金劉祁歸潛志魏徵輩修隋史不爲文中子立傳將毋以旣擬其師於聖人欲列於傳恐小之欲援孔子世家之例而隋史無他世家故皆

不紀以爲其師之名不待史而傳乎玕按鄭康成不入後漢書儒林傳亦尊之儒林之上竊疑世之論亭林者輒以儒林遺民概之於史家之例似未有合云云非必定爲亭林專計也而有益於道學已不少矣

椒生隨筆卷六終

椒生隨筆目錄

卷七

北塘海防中軍帳額

楊忠愍公詩

沒字碑

巴圖魯

俗語引證

止盜正以救荒

幕客授職

尹文端條告語

汪煥曾先生撰聯

胡文忠書牘

孝子慈孫

何子貞太史集字聯語

陳子鶴太宰

朝轎故事

耆相楹聯

驛書不過六百里

棋爭邊角

天籟詩

幾何

天子門生

論六軍

白話

餉

兄弟薰蕕

秀才所習

金陵昭忠祠

王烈婦

卷八

咏雪

胡文忠薦賢

封岳鄂王敕語

青玉案

保舉勅格

游侍御疏語

糊塗粥

鰲陽題壁詩

陰曹門聯

疏語沈痛

三元

傷亂詩

示逆靈兆

絕對

三聲

爲令八難

戴文節面奏語

北人好食蔥蒜

保甲

短掛戰裙

鬼教

選兵良法

少年科第

邑令宜爲循吏

黃太守

百歲壽母賜果圖

河套

鄧侍御疏略

帶肚

首山

八仙

司字平仄均用

顧亭林徵君

椒生隨筆卷七

清泉王之春譔

北塘海防中軍帳額

予書無倦二字於中軍帳額而跋其後曰安不忘危
文不廢武豫道也凡事豫則立不豫則廢士君子先
勞無倦思患豫防真有不遑寢處者北塘爲海濱重
鎮自前明以迄我朝魚鹽舟楫之利稱富饒焉向有
礮臺舊址慶光年間重建洎咸豐初僧邸以社稷重
臣加意洋防不遺餘力而南北三礮臺巍然并峙迺

變生不測禍不旋踵守禦無人事機已失去歲春合
肥相國移節直隸督師天津見北塘據上游形勝與
大沽並重調練通永一軍以本鎮帥統其師礮臺之
麓左右列營余以翼長副之領右軍逐一草創日不
暇給今春以次就緒而中軍尙無下榻處固失體裁
亦無以爲講武之所遂拓地三弓建屋三楹屋後東
西偏附修小屋各四中設廳事右啟書室前置迴廊
以麥夏始以五日前落成居於斯游於斯得日與營
哨士卒嘗源源接見於斯暇則講求弓馬射以觀德

偶倦於勤輒手史冊一二卷參觀古今治忽之由與夫成敗利鈍之蹟余雖不文未敢以芝蔴鑑自詡軍中讀書作運籌帷幄故事詩云職思其居孔子有言居無求安蓋常於此言凜凜矣同治十年辛未天貺日之春自記

楊忠愍公詩

容城楊忠愍公文章爲忠節所掩甚至有人謂公不工詩或謂公臨刑詩二首已足千古他作均可置之余每讀公詩集中多清絕語句節錄之以誌景仰云

知己漸隨流水遠離愁端與削山平

送劉棻涯
考績北上春歸

芙蓉晴花合天入燕雲曉旆寒

送大宗伯兩
洲王公考績

寒欺草

榻涼如洗風捲星河動欲流報主獨憐成孟浪論交

誰復憶同游

感月有懷

君愛寒官儂愛死古來天地幾癡

人

送德觀海
分教偃城

寒雁不堪雲暝夕秋風況是葉飛初

送徐

龍灣審
錄江南

志欲小天下特來登此山仰觀絕頂上猶是

白雲還

登太山極
頂因題

沒字碑

乾陵一碑無字不知其故云于闐國貢者見州志又

泰山有沒字碑或云是碑匱也又汴梁秦檜墓碑無字蓋穢德有不堪書者矣

巴圖魯

巴圖魯以賞有功王漁洋皇華紀聞作把土魯自註把土魯勇也元時必出上賜本朝亦然後作巴圖魯近且由下陳請上賜鈔以清語漢語之嘉名耳或曰巴圖魯猶言好勇也

俗語引證

俗語有本於載籍者有載籍用俗語者引證十數則

以資考据姑息禮檀得法國語是良史有分問無分

左傳子華對聽情漢書王侯表沈猷夷侯受元買賣

楚靈王語聽情狩五年坐可宗聽情不具

漢書食貨志新蔡更名天門生漢書佞內顧漢書楊

下田日王田不得買賣門生幸傳內顧僕傳失

其內老先生漢書賈誼傳每詔下諸老衙門三國志

顧袁紹攻

公孫瓚毀陽溝郭璞爾雅註陽溝巨鵬古之名雞尊

其衙門陽溝亦作羊溝太平御覽陽溝之雞尊

大人陸士龍答車茂安永書尊舉家大小車茂安答

便習謝靈運富春諸當面背面杜詩當面輸大廊老

詩游至宜便習當面背面心背面笑

楊椒山與少司寇吉陽何公

書自大廊老去後吾無憂矣

止盜正以救荒

楊椒山先生上徐少湖書有云聞各處撫按分付各屬官今日且暫寬治盜之法其意懼生變也以故各官於賊之獲俱姑息寬縱之此端一開爲盜者衆貧者日至放肆富者日不安生是民之爲盜雖起於年凶亦上之人有以教之耳夫濟荒自有長策未聞教民爲盜以救之也況漸不可長民不可逞恐隄防一撤紀綱遂壞其變有不可勝言者宜速行令各處撫按有司使遇盜賊仍治之如法則禁盜乃所以止盜而止盜正所以救荒也毛西河云此大聖大賢大經濟

大作用不意先生遂能到此明末山東大饑有搶米者太守王雪子推官陳臥子皆殉國名臣當時堅執抵法曰吾殺亂民非殺饑民也其論與先生同止盜救荒一言卽生道殺民之意

幕客授職

古之參謀記室卽今之幕客也雍正間 上諭云嗣後督撫所延幕客須擇歷練老成深信不疑之人將姓名具題如効力有年果稱厥職行文咨部議敘授之職位以示砥礪欽此今則久不具題遂無授職

者矣

尹文端條告語

辦賑最非易事偶不實心實力造孽莫大況自利乎
尹文端繼善督兩江時辦賑條告語有云倘不肖有
司剋賑肥家一有見聞斷不能倖逃法網卽本部堂
稽察有所不到吾知天理難容子孫將求爲餓殍而
不可得痛哉言乎

汪煥曾先生撰聯

蕭山汪煥曾先生

輝祖

初習申韓後以進士出宰楚

南時稱循吏其舊撰館聯云苦心未必天終負辣手
須防人不堪此不特入幕者宜奉爲圭臬凡有司皆
不可不知也

胡文忠書牘

胡文忠集十卷而書牘居其六皆軍事政教之言其
於親戚情話僅附一二筆有自然機趣所謂老樹著
花無醜枝也採錄之以便披讀致左季高京卿云紹
酒十尊奉上公之精氣再勞十年亦必可支所慮關
隘阻隔痰飲中梗幸早治之或曰以沉香浸酒則永

無關隔之症然林翼精氣日形其短頗惜此才也致

莊蕙生

受祺

云堯仙

呂公孫

藩黔吾方守黎平又一年

而吾旋楚堯仙陞閩撫道阻不能至長沙派兵百人

由辰州上迎入安化在印心石屋門首經過其幼女

嬉笑岸旁柳陰下陶少雲

梳

欲以年家誼託女蘿連

年從戎尙未函商而堯仙則已古矣堯仙爽直有氣

概治黔有聲至今思念之不僅私交之密也乞與仲

遠商酌成全之法致官使相云聞尊體日漸復元應

健脾胃爲主脾胃者人之元氣也潛山天柱漢代尊

爲南岳漢武巡狩由盛唐至潛登天柱泛舟樅陽射
蛟潯陽江中卽其地萬山崒嶺獨產天堂野朮土人
以繩縛腰別繫繩樹石間跳身絕壑懸巖間以采之
惜所得不多第服之大效其和平中正如老兄性格
付上一匣計野朮三十五枝如試服有效秋冬再可
購覓奉上

孝子慈孫

楚語士虺曰堯有丹朱舜有商均啟有五觀文王有
管蔡皆元德也而有姦子韓文公子昶闇劣誤金根

車爲金銀史直翁浩爲相非無一善可稱子彌遠爲
權臣而掩其父之美呂文靖夷簡爲相非無一疵可
議子公著爲名相而揚其父之美楊涉而有子凝式
張浚而有子栻如呂楊張三公眞孝子也王導之孫
謚而授璽綬於桓元謝安之孫澹而持冊於劉裕顏
見遠孫之推而喪節韓魏公孫侂胄而墮宋豈詒謀
之不善乎如陶侃之孫淵明見遠之孫之儀元
孫常山平原二公者眞慈孫也語云有錢難買子孫
賢是人力不爲功而天理尤不可測矣

何子貞太史集字聯語

道州何子貞太史

紹基

爲文安公

凌漢

哲嗣書法甲

天下余見其所集爭坐位帖字聯滅盡鍼綫痕迹眞
才子也亟全錄之七言云九功惟敘使勿壞百度得
數而有常宣德道情文乃貴明微謹始禮爲宗與其
過縱何如謹到得能誠自會明悟到前身應是月數
來好友莫如書明月同行如故客異書難得比高官
兩足不出門半尺一室坐擁書百城行事莫將天理
錯立身當與古人爭聞常言輒有至理愛別致便非

本心且自思立足得地豈可輒抗顏爲師藏異書貴
得初本收古畫須檢裂文有三尺地身可坐到五更
時心自清如張子野眞醉伯是李將軍乃畫師時事
亦當參古禮人爲不敢恃天功對月橫安高士榻論
文喜得古人書縱目古今還自省側身天地一無言
倫理只從天事見功名貴自本心來古易九家皆見
聖魯論半部足匡時然名香宜對古畫見明月又來
故人書城高大能藏道心地光明始愛才八言云揆
高度深九數所極指事會意六書之綱將相公侯蓋

亦有命射御書數皆謂之文坐榻橫書陞臺校射然
香品畫對月開尊武將宣威自天而下文臣記盛如
日之升瞻言古人便若同世措置難事亦如平時見
人之過如己有失於理既得卽心所安力排眾議乃
見獨是心師古人自爲一家就已然情知未來事於
獨居地見大眾心有功不伐聞過則喜爲道日益積
德能升縱橫百家才大如海安坐一室意古於天天
壽崇高初無階級書城割據各異門途意之所忽過
從此長眾有同欲功不可居聖業顏曾清名李郭相

才文富士品裴王十言云參三六九易數皇極斯寓
合百二十國書魯史乃與十一言云何必開門明月
自然來入室不須會友古人無數是同心十二言云
戴勝祖高堂士禮從知家相作子長事安國尙書眞
見古人來十三言云士禮守容臺本東魯兩聖人所
定佛書破藏海是南朝眾才子之文十四言云明理
自平居莫到有事時存兩端念置身須得地當爲從
古來第一等人二十七言云行路有何難我曾從天
柱九疑終南紫閣太室三塗直到上京王者地得師

真不易所願與高堂二戴安國子長相如正則同依
東魯聖人居

陳子鶴太宰

陳子鶴太宰 孚恩 為荔峰侍郎 希曾 次嗣書法冠一

時以拔貢起家歷官清要其攝東撫時未受鹽務陋

規蒙 賞清正良臣匾額咸豐十年七月 朝

命諸臣會議幸熱河事太宰有竊負而逃遵海濱而

處之語十一年在熱河又力阻回 鑾 今上

登極載垣等敗許仁山侍郎 彭壽 以黨援參奏褫職

旋戍新疆可爲奏對不慎者戒

朝轎故事

鍾繇有膝疾拜起不便時華歆亦以高年疾病朝見皆使載輿車虎賁昇上殿就坐是後三公遂以爲故事見三國志今之賜朝轎者即朝馬意蓋本此然止及景運門而止不能昇上殿也

耆相楹聯

耆介春相國英有滿洲才子之目然頗自負

宣廟優遇之嘗褒爲有膽有識迨文宗嗣統恩

禮寢衰屢奉

嚴斥有無恥無能之

論者揭

一聯於楹云

先帝隆褒有膽有識

時皇罪

過無恥無能頗爲

上聞非亦足以殺其軀乎

驛書不過六百里

今軍事至急者驛書日六百里考三國志陳泰傳泰每以一方有事輒以虛聲擾動天下故希簡白上事驛書不過六百里又考漢書屈犛乘病置爲急遞日行四百里古以四百里爲至速至三國時乃定此限耳

棋爭邊角

圍棋國手最爭邊角劣手則爭中腹諺云金角銀邊
草肚皮此之謂也宋劉彥修子羽之言曰善弈棋者
不爭邊角之藝名臣之論卻欠精理

天籟詩

澧州乞食道人游一瓢詩曰磨快鋤頭挖苦蕩不知
山下白雲深多年寂寞無煙火細嚼梅花當點心游
食多年不害羞也來城市看救樓東風不管人貧賤
一樣飛花到白頭破寺無僧好挂瓢閒時歌舞醉時

簫黃昏月落秋江裏沒箇人來問寂寥門外何人喚
老游老游無事聽谿流而今世事多荆棘黃葉飛來
怕打頭天籟也而道味盎然轉覺摹唐規宋之同嚼
蠟矣

幾何

西洋算法書名幾何乃春秋時冉求所造今中國轉
無此書且學算法於洋人而不克善其術甚矣古今
人之不相及也

天子門生

秦檜欲收羅逵於門下羅不屈檜大怒必欲殺之而檜死矣高宗曰不愧天子門生逵本紹興辛未狀元今稱翰林爲天子門生者本此然非狀元不克當非如逵者不敢當也

論六軍

直隸練兵於保定正定遵化古北河間宣化曰六軍軍各二千五百人部申於京餉外復立固本名目由直隸按月請領此劉制軍長佑所奏辦也故戶部統籌財用源流一疏有云同治六年七八月間梟匪乘

機竊發以百數十揭竿之眾橫行數郡擾及近畿所
調六軍者既未能先事預防以杜亂萌並未聞一矢
加遺以推凶焰又云各路多有雕一木質關防徑行
赴部支領帑餉者十羊九牧不知節制無益於事臣
等實深惜之云云夫不練勇而練兵誠善舉也惟行
伍廢弛已久非旦夕所能有功 朝廷特調曾文正
八年到任從新整頓芟繁就簡漸有起色十年冬李
少荃傅相改調遵化一軍移紮北塘海口易名通永

白話

南方人謂與閒談曰白話又空言無實際之謂俗語也考翰林志翰林所著撰教坊致語曰白話則俗語居然典故矣

錫

今人書劄之尾每有不錫字樣攷錫音賜義切李密傳云敖庾之藏有時而錫潘岳西征賦云起長懷以遐念若循環而無錫張銑註錫盡也六朝人喜用僻字遂相沿至今云

兄弟薰蕕

顏之儀而有弟之推歷事梁齊周隋朱溫而有兄全
昱斥其滅唐王安石而有弟安國請其遠佞史可法
而有弟可程爲二臣一薰一蕕萬難陶化又何疑乎
舜之於象武周之於管蔡展禽之於盜跖哉

秀才所習

宋初尙文選當時文人專意此書至爲之語云文選
爛秀才半見放翁老學庵筆記近日文人專攻四書
甚至五經亦不全讀子史集更置不顧因有四書熟
秀才足之語蓋古以雜作取士今以時文取士故所

習殊也然時文愈趨愈下吾甯爲古之半秀才不爲今之足秀才也

金陵昭忠祠

江南遭兵最久殉難官紳最多江甯先有湘軍昭忠祠在城北蓮花第五橋係克城之初就僞王府略爲修葺者後就地並建三祠中仍爲湘軍陸師昭忠祠東爲金陵軍營官紳昭忠祠西爲湘軍水師昭忠祠而東祠約分六端一曰咸豐三年金陵城陷滿漢文武殉節之員二曰自癸丑至庚申八載向榮和春營

中陣亡傷亡及病故之員三曰江甯七屬历年殉難之紳及外籍而寓居金陵遇難之紳本籍而陣亡於外省之紳四曰生平久居金陵大營其後盡節他處如鄧紹良周天受張玉良之類五曰揚州鎮江兩軍皆因圍克金陵而設兩處陣亡傷亡病故之員六曰金陵滿漢婦女不屈而死者別立貞烈祠祀之此同治七年春江督曾公國藩所奏辦也並查事實書立神牌詳盡之規足垂千古

王烈婦

江南鎮江府西門外大圍坊民人趙維興妻睦氏賣鴉片煙爲業其媳王氏年二十于歸甫一兩載氏夫常在外姑屢誨淫不從潘道士素與姑往來者貪氏色賄其姑甲午八月十九日姑引道士匿氏牀側欲俟就枕污之氏驚覺拒之益堅喊哭聲聞戶外道士遁去姑憤極以錐刺氏下體殆遍氏閉戶更衣裳上下縫紉帶傷服生鴉片死次日其母家鳴於官道士賄之攔驗冤不得雪節未能彰里人爲痛惜之桂丹盟時宰丹徒爲請於上曰似此操勵冰霜志堅金石

經百折而不辱。拚一死以如歸。玉出濁流而不變其
潔。芝生溷廁而自噴其香。眾口一辭。斷難磨滅。寸心
千古。應發幽潛。倘教東海冤沉。恐阻三年之雨。惟使
南山案定。可扶一國之風。中丞命捕道士。鞠之治如
律。婦得旌於朝。

椒生隨筆卷七終

椒生隨筆卷八

清泉王之春譔

咏雪

予向有咏雪斷句云本色還他天下素窮冬著徧樹
頭花後見鮑西園茂才咏雪有云原來世界都清白
始信乾坤無淡濃之句意蓋相類

胡文忠薦賢

胡文忠薦舉賢才疏有云某某均未識面亦無文字
往來訪聞既確據實附陳以備
聖明採擇夫用

人行政 朝廷自有其權舉爾所知芻蕘不嫌下問
臣力疾從軍不敢自逸惟恐先犬馬填溝壑若目覩
時局艱危避忌模稜知而不言負 恩實大 云云

近日封疆專閩大半皆出公門曾侯相謂爲薦賢滿
天下良不誣也昔東坡與友人書薦黃魯直秦少游
不但以爲後出之秀直以爲天人後二君得以成家
名傳後世東坡之力也彭雪琴宮保謂爲聖賢作用
菩薩心腸英雄手段能令千古文人豪傑一齊下淚
予謂今之胡文忠與昔之蘇文忠豈曰古今人不相

及哉

封岳鄂王敕語

宋甯宗封岳鄂王敕起語云人主無私予奪一歸萬世之公天下有公是非豈待百年而定中有云時屬講好將歸馬華山之陽爾猶奮威欲撫劍伊吾之北遂至樊蠅之集遽成市虎之疑雖懷子儀貫日之忠曾無其福卒墮林甫偃月之計孰拯其冤云甯宗善補先過然如敕中語使高宗置身何地耶武穆在九泉下知之自必涕零吾輩生千載後讀之亦爲淚

溢

青玉案

予嘗言裘小華侍御詞華粗豪小華一日出示午夜
無聊枕上偶成調寄青玉案二闕一變而爲柔曼之
音令人擊節不置其詞云夢回枕畔疑風雨忽引逗
閒愁緒還省夢中離合趣千般恩愛萬般冤楚一例
渾無據西園夜半猶歌舞怎不覺歡娛苦輾轉衾裯
天欲曙雞聲淒緊漏聲容與曉色濃於絮其一凝眸漫
把歸鴉數却早又霜林暮徙倚畫闌干曲處含情無

語多應有恨，早又初更鼓。香巢紫燕都飛去，定不肯
和儂住。默誦出山泉水句，佳人空谷。蕭條修竹，秋盡
今宵雨。其二

保舉勅格

同治庚午三月，曾侯相出任直督，保舉十員。疏語有
云：「不過表其政績，並不稍乞。」恩施古來循良之
吏，或有璽書褒異，非必歲歲遷官，人人進秩也。近世
各省保舉浮濫，習見不珍。該員等雖無獎拔之實，而
循聲達於 聖聰，卽光寵逾於華袞，等語。人謂爲

保舉擢格近見沈幼丹制軍薦舉賢才十二員疏有
兩江急切需才舉其姓名而不敢遽求 恩澤之
語先後同揆若合符節

游侍御疏語

同治庚午正月游侍御百川以雪澤愆期日食遞見
請增修 聖德一摺中有云查道光年間 國家
廣庶富之業內而廷臣外而督撫率以粉飾太平爲
務州縣習於侈汰以能逢迎者爲良吏以多機械者
爲幹員吏治旣頽亂機斯伏等語奏奉 諭旨直

言無隱之臣際虛懷納諫之
主爲古來所罕觀
也

金陵城垣考

按查金陵之名始自周末楚威王滅越置金陵邑秦
始皇改爲秣陵漢初名鄣郡元封二年改爲丹陽三
國時吳王權建都名爲建業西晉末避亂愍帝東渡
駐蹕於此王丞相導營建國都於舊城稍加增擴以
天子所居禁省爲臺遂稱臺城雞鳴寺北極閣等處
卽臺城北址也嗣後割據東南如宋齊梁陳皆建國

都隋文帝統一區宇更名蔣州唐初名潤州至德二載置江甯郡乾元元年改昇州五代楊溥時爲金陵府徐知誥名江甯府宋初爲昇州建炎三年改建康元初爲建康路天曆二年改爲集慶路明初爲應天府成祖以後爲南京雖地名紛更實則皆指爲臺城六朝舊城均近覆舟山去秦淮北約五里許臺城西爲石頭城卽今之鬼臉城孫吳時江在石頭城下爲險要必爭之地初築土塢後因山加甃遂爲石頭城設揚州官廨於其中臺城之東南爲東府城孝文

王道子領揚州牧仍居先舍故俗稱東府卽今通濟門左右也六朝時太子宮及王侯士大夫府第皆在焉東府石頭皆爲臺城之屏蔽六朝以來凡兵自南入皆先取東府石頭二城自京口來者則直取臺城焉治城在石頭城之南孫吳時王宏茂治爲鼓鑄之所今朝天宮卽其遺址後瑯琊城一名白下城齊武帝以其依山帶江徙金城治於此金城卽前瑯琊城亦名宣武城晉元渡江僑立瑯琊郡在上元東北金陵鄉在臺之北今神策門外之石灰山下其故址也晉書蘇峻據石頭城將攻京口晉兵

之屯白下者得聞其集眾鼓聲以相望不及十里故也同夏縣城在東府城之南隅梁武帝生於同夏里置縣爲城以舊宅爲光宅寺今城南飲虹橋孝侯臺卽周臺卽其故城遺址考之志載臺城北雞鳴寺南之通濟門卽別爲東府城臺城之不廣可知故東宮及王侯第皆不居臺城而居東府城世說會稽王遶東府城行散則東府城可以徐步周行其不廣亦可知他如白下城僅屯兵二千石頭城因山爲壘專爲扼江岸之險而設治城但爲鼓鑄置城不置邑規模之

小可想見矣楊吳度其形勢併合各城從新改築跨秦淮南北周廿五里建宮城於天津橋北其外城南盡長干橋西帶冶城石頭城東止今之通濟門北至北門橋當時迤北西流小水皆截入城濠今之北門橋及浮橋竹橋大中橋一帶河水卽東北城濠也紹興渡江仍卽故都稍加修治洪武初因宋元舊城推而廣之西南就其遺基東自東門截濠開拓增建南門二曰通濟曰正陽東北跨雞籠山轉折而西循湖濱迤邐而北其北從北門橋外包北郭十餘里江甯

縣所屬之舊邨並括獅子山悉為城內二年九月興
 築六年八月告成周九十六里共十三門建宮城於
 東隅順治初改宮城為駐防城略因其舊西南一帶
 順治十七年重築起太平門至通濟門東止長九百
 三十丈連女牆高二丈五尺遂以外城為江甯府治
 此則得自吾衡曾雲門司馬尋譯江南省志詳備可
 考

古今同姓名人

古今同姓名人兩賈舉兩曾參兩孔忠魯兩毛遂兩

韓信六公孫宏十一王褒劉宏九張良八張敞王吉

三李密張萬福兩劉德父子同名嚴延年均漢兩孫叔敖楚漢

兩朱買臣徐庶漢南兩劉歆新莽兩安屈魏安同兩桓

彝吳晉兩王肅魏後兩高湛北魏兩薛收隋兩羅靖隋父

子同名兩李愿李益韓翊均唐兩李煜唐南兩蔡京唐兩

張旭唐明兩李之芳唐國朝兩王鐸唐國朝兩陳詵晉國朝兩

訛可兩韓玉綸三婁室均金兩張載晉宋兩王安國宋國朝

兩脫脫元俺答兩劉江明父子同名國朝兩于成龍

張鵬翀又楚漢均有虞美人

多忠勇公

多禮堂將軍

隆阿

戰功卓著身之所臨無不出民水

火而秦中百姓尤感戴焉蓋回逆未經鉅創迨數年
公入陝後每戰輒斬獲無算諸回畏若天神至以公
名怖小兒啼後以擒匪陷蓋屋公督隊攻城中礮陣
亡民間之皆巷哭鄉間多肖像以祀猶山東人之於
僧忠王也嘗讀胡文忠與公書云聞兄日夜憂勤又
身在礮子中經過甚為馳念兵事貴乎審機以待戰
尤貴蓄銳以待時大將自臨城下四五十步縱不自

惜如軍事何如國事何且吾聞臨陣而不避矢石不
避槍礮謂之勇未聞城下仰攻我動彼靜我勞彼逸
我無備彼有準從礮子經過而謂之勇也天下強兵
良將本不易得若再不自尊重則東南半壁何以支
持云公卒坐此病以罹於難文忠其知言哉公籍
滿洲諡忠勇

論三督撫

胡文忠致曾侍郎云林翼嘗笑崑臣爲督葉名琛而
不知粵西爲何人所轄根雲爲督何桂清而割皖南

皖北并割江北其失機在推諉不肯任事福元修

濟

以皖北之撫而割南岸以予浙江又割淮北以予公
路宜其日蹙百里而軍政日非也葉何名節不終福
則再起爲定邊將軍論得坐病之本并非刻以繩人
也

魯竹亭詩

詩貴有性靈有寄託若徒作門面語味同嚼蠟而已
張仲軒誦其友人與魯竹亭孝廉 栻 詩云深紅淺白
雨中鮮雨太多時花可憐但乞春陰不乞雨兒家門

巷海棠天又游仙斷句二韻玉皇昨夜論勳伐香案
仙官賜福多聞道劉安朝帝闕一朝雞犬盡同升興
比之遺風味雋永

癡人莫若英雄

嘗讀甌北詩有英雄大抵是癡人之句又讀劉省三
爵帥詩有云高官足榮貴身後何所有李廣若封侯
至今猶在否因憶小說石頭記中有歌語云古來將
相在何方荒塚一堆草沒了措詞異而用意同是則
千古癡人莫英雄若也然使英雄而不癡非爲山林

之真隱卽爲廊廟之大奸矣

走作

俗語有曰走作者失也又如釀製洩氣而變壞之謂昔朱子在同安夜聞鐘鼓聲聽其一聲未終而此心已自走作則宋時遂有此語出於朱子口中便合理

學精義

詩文集

趙雲松先生云有以明人詩文集二百餘種來售余所知者不及十之二三文人仰屋著書不數百年終

歸湮沒古今來如此者何限因有準擬驚人都有句
誰知點鬼也無名之句又以近日刻詩集者又十數
家戲題有云後代時逾前代久今人傳比古人難又
閱近人詩稿戲題云名士求名氣力殫到頭不出百
年問那知世有神通大臥作長河立作山夫功德不
足傳而欲藉雕蟲小技以壽世直是苦心無如燭火
之光雖照不遠可勝喟然先命匠刷印詩集之作有
云恨不借祖龍火燒盡好詩獨賸我恨不借黃虎刀
明史流 殺盡才士讓我豪大可借以自解又先生刻
賊傳

集時咏云書有一卷傳亦抵公卿貴固自負亦自信也然而傳之一字談何容易

消息信息

消息信息同義皆俗語也諸葛恪圍合肥新城城中遣士劉整出圍傳消息見三國志王子眞佺期曰正叔欲來信息甚大嵩前隱者董五經謂明道曰先生欲來信息甚大見二程外書

題畫松

興化李復堂孝廉鱣善畫自題五松圖云予以直者

比之大臣禿者比之名將一側一臥似蛟似龍蒲團
之松或仙或佛復堂在揚州八怪之列涉筆均有怪
氣然其天趣不可及也

詠被中繡鞋

雲裏蟾鉤落鳳窩玉郎沉醉也摩挲陳王當日風流
滅只向波心見襪羅此唐夏侯審詠被中繡鞋也詩
集不傳惟此一絕及織錦圖君承皇詔安邊戍一歌
而已余亦戲仿其七絕云顛倒鴛鴦蜀錦假合懽牀
上夢初回幾曾蓮步輕移動着向西廂立月來

曲成人才

滇督劉公

嶽昭

疏劾川督吳公

棠

經李少荃爵相遵

旨查辦奏言劉嶽昭傳聞失實率行彈劾大員

惟以時事多艱人才難得蒙

恩嚴行申飭山東

兗沂曹濟道長廣捕拿博匪濫刑斃命以長為東省

必不可少之員蒙

恩革職留任賈侍御

瑚

以申

飭不足以昭炯戒革留不足以蔽處分奏請另議重

辦奉

旨所奏不為無見惟未悉

朝廷曲成人

才之意著毋庸議見同治八年十月二十五日邸抄

丹心萬古

同治八年天津捐建科爾沁親王僧忠王專祠蒙

御賜丹心萬古匾額

天語褒崇幾與關仁勇

齊驅並駕矣薄海臣民能無觀感

春秋屬辭辨例

庚午十月夏公

同善

等進呈春秋屬辭辨例八十卷

爲浙江前內閣中書張應昌所著奉

旨留覽春

秋大旨曰事曰文曰義屬辭辨例三者所以數其事
顯其文因以著其義也蓋不必立例而義自見屬辭

可賅比事原本宋儒兼及眾說間附按語搜羅四百
餘家之多研求數十餘年之久而始成是書也中翰
舉嘉慶庚午鄉科前歲例得重宴鹿鳴年已八十又
八矣

臘底庚申

俗以冬至後逢庚申日爲臘底庚申凡婚嫁喪葬不
必諏吉多不可用之先大夫信地師言葬我先曾王
父母遂用此日乃大不利深自疚悔時舉爲戒爰附
記於此以爲後車之鑒

直隸水災

辛未夏秋直隸大水順天保定天津河間境內有成
爲澤國者自保定至京師須用舟楫乃數百年來罕
見之災李伯相截留南漕二萬石以賑然黃河漸歸
故道北方水患恐難免歎

鑄奸

張睢陽廟鐵鑄賀蘭進明鄂王廟鐵鑄秦檜王氏万
俟尙張俊河南增鑄王貴陳太學祠鐵鑄汪伯彥黃潛善少
快千古人心康書臣讀史詩云剛腸盛德爲狂狷志

大才疎笑史官曲阜擬添北海廟也將白鐵鑄曹瞞
予謂楊忠愍祠宜鑄嚴嵩于忠肅祠宜鑄徐有貞石
亨睢陽廟添鑄許叔冀表忠懲奸方更快人

海運

海運漕糧取其速而簡便也後因黃河水歸故道運
路不通遂歲以糧米航海由津運京勦自元之朱清
張瑄本朝至道光間乃屢行之今則著爲定章無復
河運之議光緒紀元四月劉侍御瑞祺以河運暫停
由於運道艱阻奏請復行河運依時舉行以復向章

而維久遠一疏有云臣查上年前督臣李宗羲等奏將江北漕米改歸海運原聲明俟山東治河事定卽復向章誠以奏改海運者權宜之議酌復河運者經久之模也而臣竊有慮者李宗羲等奏陳江蘇山東境內漕船難運情形皆以黃水南趨爲害本年山東撫臣丁寶楨督辦隄工實爲不避艱勞而於南趨溜勢能否全行挽救尙未可知設使黃流別繞仍益南趨一則淮揚漸受其患欲爲屏蔽之計祇有堵閉一法而江蘇境內之艱阻如故也一則北流之水愈少

濟甯以北難以藉資浮送而山東境內之艱阻如故也治河未有定局來年雖欲復河運奚可得哉昔孟子云山徑之蹊間介然用之而成路爲間不用則茅塞之矣今日以艱阻之故而停河運此後恐因停河運之故以致各工棄弛節節淤塞而艱阻日甚一日是數百年之運道自此馴就陘廢也是南北之氣脈自此隔而不通也況乎海運非可常恃本年運糧輪船聞有沉覆之患向之樂其便者將來恐咸憚其險若不先事籌防於河運力求擴充之道何以重倉儲

耶臣明知河工辦理之難經費之絀而度勢審時急務莫先於此應請 飭下管河諸臣速查全河形勢統籌疏治爲來年復行河運地步等語奉 旨報可憶少陵後出塞詩有云漁陽豪俠地擊鼓吹笙竽雲帆轉遼海粳稻來東吳則海運自唐始也

箴言

人生不外動靜二字靜無不動一定之理也動而能靜則存乎一定之心矣每於此下工夫而未之逮因摘箴言與靜字一一符合者常留座右亦顯孫書紳

之意也敬錄於后天地間真滋味惟靜者能嘗得出
天地間真機括惟靜者能看得透灑脫是養心第一
法謙退是保身第一法安靜是處事第一法涵容是
待人第一法自處超然處人靄然無事澄然有事斬
然得意淡然失意泰然有才而性緩定屬大才有勇
而氣和斯爲大勇有作用者氣宇定是不凡有受用
者才情決然不露意麤性躁一事無成心平氣和千
祥駢集以和氣迎人則乖沴滅以正氣接物則妖氛
消以浩氣臨事則疑畏釋以靜氣養身則夢寐恬觀

操守利害時觀度量在喜怒時觀存養在紛華時
觀鎮定在震驚時寡慾故靜有主則虛大事難事看
擔當逆境順境看襟度臨喜臨怒看涵養羣行羣止
看識見

電報

西人以藥物製銅線能發電氣曰電線縣長萬里傳
遞信息數刻可達謂之電報其線如達水程裹以象
皮周圍將鐵線護之再以膠漆外塗沈巨浸中陸路
則排列大柱線架其上至遞報之法彼此線尾各置

針盤一具列二十六字母此擊彼應此處針指某字母彼處亦指某字母由字母配合數目號碼一號配一字共六千八百九十九號配六千八百九十九字刊成一書曰電報新書所報皆號碼有書即可檢查行棧家有秘密信可將號數暗訂兩地心照謂之金匙開鎖則局外人不知作何語矣

毛詩註

論語云鄭聲淫謂其聲之淫非謂其詩也非鄭衛之詩無一不淫也要知聲詩自有分別至朱子註詩一

則曰淫奔之詩再則曰男女相贈未免臆度余誦毛詩感賦一絕云諷誦篇章動我疑世間難事數佳期如何鄭衛淫奔者情到濃時儘作詩見者失笑

怪魚

李淳風感應經云河有怪魚乃名爲鰐其身已朽其齒一作此卽鰐魚也南州志云斬其首乾之椽去其齒而更復生余上年駐軍北塘海口有漁者舉網甚重收視之乃一水族而獅形者目怒聲吼遍身鱗甲雖海濱老漁莫能詳其種類遂出資囑漁者仍送之

海似有知識翹首者三若拜揖然殆大海之中無所
不有不必少見多怪也

老萊子

可食以酒肉者可加以鞭捶可授以官祿者可隨以
斧鉞此老萊子語也人生在世自有衣祿與人無爭
與世無求可也而乃攫心富貴自取束縛何不將萊
子數語往復玩味耶又況天空鳥飛海闊魚躍人而
酒食官祿之是驚將鞭捶斧鉞其奚辭直魚鳥之不
若矣噫

罡風匣

洋人有罡風匣者高尺許四方如斗以匙啟之剗然
出一凸玻璃中空無物少頃則玻璃色漸白下開小
穴納一活麻雀雀初入猶在匣底跳躍漸飛高近白
氣若力不勝而又不能已者旋即渺然未幾蓋自閣
內有風歸穴聲殊振厲駭疾也復啟小門以銅管吹
之但見毛出如綴而已罡風在天凡血肉之軀皆不
能禦不知洋人何術取得之也

地形如肺

大地之土環北冰海而生披離下垂如肺葉凹凸參差不一其形泰西人分爲四土地球東半之土相連曰亞細亞曰歐羅巴曰阿非利加地球西半曰亞墨利加中華僅得亞細亞四分之一耳

椒生隨筆卷八終